

Igaragaza Ry'

## Ibihe Birindwi By'itorero

Igice Cya Munani

### Igisekuru Cy'itorero Ry'I Filadelifiya

Ibyahishuwe 3.7-13:

*Wandikire marayika w'itorero ry'i Filadelifiya uti: "Uwera kandi w'ukuri ufite urufunguzo rwa Dawidi, ukingura ntihagire ukinga kandi ukinga ntihagire ukingura, aravugaaya magambo ati: 'Nzi imirimo yawe. Dore nshyize imbere yawe urugi rukinguye kandi ntawubasha kurukinga, kuko ufite imbaraga nke nyamara ukitondera Ijambo ryange, ntiwhakane izina ryange."*

*Dore nguhaye bamwe bo mu isinagogi ya Satani biyita abayuda nyamara atari bo, ahubwo ari abanyabinyoma. Dore nzabahata kuza bikubite imbere y'ibirenge byawe, bamenye yuko nagukunze.*

*Kuko witondeye ijambiro kwihangana kwange, nange nzakurinda igihe cyo kugergezwa kigiye kuza mu bihugu byose kugergeza abari mu isi. Ndaza vuba komeza ibyo ufite hatagira ugutwara ikamba ryawe.*

*"Unesha nzamugira inkingi yo mu rusengero rw'Imana yange, kandi ntazasohoka ukundi, nange nzamwandikaho izina ry'Imana yange n'iry'ururembo rw'Imana yange ari rwo Yerusalem nshya, izamanuka iva mu Ijuru iturutse ku Mana yange, kandi nzamwandikaho izina ryange rishya".*

*"Ufite ugutwi niyumve ibyo umwuka abwira amatorero."*

### FILADELIFIYA

Filadelifiya yari iherereye kuri mayilo 75 [ibirometero 120. -Uhindura] mu magepfo agana iburasirazuba bwa Sarudi. Wari umugi wa kabiri wa Lidiya. Yari yubatswe ku dusozi twinshi, mu gace kari kazwi cyane ku bw'ubuhinzi bwako bw'imizabibu. Amafaranga y'ibiceri byaho yari ashushanyijeho ifoto ya Bacchus (ikigirwamana k'imizabibu. -Uhindura) n'icya Bacchante (umugore ukuriye umuhango wo kuramya Bacchus). Abaturage bawo bari bagizwe n'Abayuda, abakristu bakomoka mu Bayuda n'abanyamahanga bari barahindukiriye ubukristu. Uwo mugi wagiye uhura n'imitingito y'isi myinshi, nyamara, mu migi irindwi ivugwa mu Byahishuwe, ni wo warambye igihe kirekire kurusha iyindi. Mu bigaragara, na n'ubu uracyariho ku izina ry'igiturukiya rya Alasehir, bishatse kuvuga "Umurwa w'Imana".

Ibisigazwa by'ibiceri byatahuwe bitwerekko imana y'uwo mugi yari Bacchus. Nyamara, Bacchus ni we Ninus cyangwa Nimurodi. Uwo "ni na we baririra", nubwo abenshi muri twe bavuga bagaragaza ibantu by'urukozasoni n'ubusinzi.

Ngicyo igitanga umucyo mu bitekerezo byacu. Hano tuhafite igiceri cy'amafaranga gifite ku ruhande rumwe imana, naho ku rundi hakaba umuyobozi w'umuhamgo wo kuramya cyangwa umuhanuzikazi. Nyamara, mujugunye igiceri hejuru mu kirere. Ese ibyo byagaragaza itandukaniro niba kiguye kikagaragaza uruhande rumwe cyangwa urundi? Oya, mugenzi, gikomeza kuba icyo giceri ntighinduka. Ngiryo idini gatolika, rya Yesu na Mariya.

Ariko ntidutekereza gusa kuri Roma. Reka da, hariho gusa Maraya ukomeye wenyine. Nta gushidikanya. Ku bw'ibyo, yahindutse umugore wabyaye kubera ubusambanyi bwe. Abakobwa be ni ibiceri byakozwe kimwe na we. Uruhande rumwe, bashyizeho umuhango wo kuramya Yesu, ku rundi, bafite na none ukuriye umuhango wabo wo kuramya - cyangwa umuhanuzikazi- wandika inyigisho ze zo kwizerwa, amahame ye n'inyigisho ze, kandi akabigurisha abantu kugira ngo abemeze ko bahawe agakiza, maze akavuga ko ari we, kandi we wenyine, ufite umucyo.

Ni ibantu bitangaje kubona ukuntu iki gisekuru kigaragazwa n'igiceri cy'amafaranga. Kuko abakobwa, kimwe na nyina, bagura ukwinjira mu ijuru kwabo kose ku kiguzi cy'amafarana. Nta bwo ari amaraso, amafaranga ni yo aba ikiguzi cy'ugucungurwa. Nta bwo ari Umwuka, amafaranga ni yo mbaraga ikora byose kuri bo. Imana y'iyi si (Mamo) yabahumye amaso.

Ariko ubucuruzi bwabo buzana urupfu bidatinze ntibuzongera kubaho, kuko ari muri iki gisekuru Umwuka arangurura n'ijwi rirenga ati: "Dore, Ndaza vuba!" Yego, ngwino vuba, Mwami Yesu!

### IGISEKURU

Igisekuru cya Filadelifiya gihera mu wa 1750 kikageza hafi mu wa 1906. Kubera insobanuro y'izina

ry'umugi, iki gisekuru kiswe Igisekuru cy'urukundo rwo gukunda Bene Data, kuko Filadelifiya bisobanura: "urukundo rwo gukunda Bene Data."

## INTUMWA

Nta gushidikanya guhari na kumwe ko intumwa y'iki gisekuru yari John Wesley. John Wesley, yavukiye i Epworth ku ya 17 Kamena 1703, akaba yari umwe mu bana cumi n'ikenda ba Samuel na Susanna Wesley. Ise yari umushumba w'itorero mu kigo runaka mu Itorero ry'Abangilikani; ariko umutima wo kubaha Imana wa John Wesley nta gushidikanya ukomoka cyane cyane ku mibereho ntangarugero ya nyina, kurusha uko yaba yarakomotse kuri tewolojiya ya se.

John aba intiti y'unmunyabwenge. Mu gihe yari ari ahitwa Oxford ni bwo we na Charles bihuje n'itsinda ryitoje mu buryo bw'umwuka gusenga Imana babaho imibereho ijyanye n'ukuri ku bw'ikintu cyababayebo cy'umwuka gifatika aho gushishikazwa no guhindura inyigisho umurongo ngenderwaho. Bakora ikintu cy'ubuyobozi bw'Umwuka gishingiye ku mirimo nko gufasha abakene, gusura abarwayi n'abari mu nzu z'imbohe. Ni ku bw'ibyo babita izina ry'Abametodisiti b'abakene, n'andi mazina yandi.

Nyamara, John yarebaga ukuntu amoko atuye isi yari anyotewe n'idini yubaha Imana, kandi akabibona ku buryo bugaragara kurushaho ku buryo yagiye muri Amerika (muri Georgie) nk'umumisiyoneri kugira ngo abwirize Ubutumwa Bwiza Abahinde. Mu gihe yari mu rugendo, atahura ko abagenzi benshi bari bari mu bwato bari bene Data b'abamorave. Ukwicisha bugufi kwabo, umutima wabo w'ubugwaneza n'umuhati wabo mu bantu byose bimukora ku mutima cyane. Ikibabaje ni uko ukwitanga kwe n'umurimo yakoze ugoye, n'imihati yagize muri Georgie bisoza nta cyo bigeze. Asubira mu Bwongereza, agira ati: "Nagiye muri Amerika kugira ngo mpindure Abahinde ngo bihane, ariko, Yoo! Nge, ni nde uzampindura?

Agarutse i Londres, arongera atangira kugirana ubufatanye na bene Data b'abamorave. Ni Pierre Bohler umwerekira inzira y'agakiza. Anyura mu kubyarwa ubwa kabiri nyakuri, ahangana n'agahida n'intimba ikomeye bya mwene se Charles, agira uburakari bukomeye, kuko atashoboraga kumva ukuntu umuntu w'unmunyamwuka nka John ashobora kuvuga ko mbere atari atunganiye Imana. Nyamara hashize igihe gito nyuma y'aho, Charles na we akizwa ku bw'ubuntu.

Wesley atangira icyo gihe kubwiriza Ubutumwa Bwiza i Londres, ahagaze ku ruhimbi aho yabwiririzaga mbere, ariko bidatinze, ntibari bakimukeneye. Icyo gihe ni bwo George Whitefield, inshuti ye y'igihe kirekire, yamufashije cyane amuba hafi, kuko yatumyeho John ngo aze amufashe, abwirizanya na we hanze mu kibuga, aho ibihumbi by'abantu bazaga kumva Ijambo. Bigitangira, Wesley ntiyatekerezaga ko byari ibantu bikwiriye kubwiririza hanze aho kubwiriza mu cyumba cyabigenewe, ariko igihe abonye imbagya y'abantu bateraniraga hamwe, ndetse n'icyo Ubutumwa Bwiza bwakoraga ku bw'imbaraga y'Umwuka, yifatanya n'ubwo buryo bwo kubwiriza n'umutima we wose.

Umurimo ufata intera ingana ityo ku buryo yohereza, ababwirizabutumwa benshi b'abakristu basanzwe, kubwiriza Ijambo. Byari bimeze nko ku munsi wa Pantekote, aho Umwuka yahagurutsaga abantu hafi umunsi ku wundi bafite ububasha bwo kubwiriza no kwigisha Ijambo.

Umurimo we urarwanywa ku buryo bukomeye, Arik Imana yari iri kumwe na we. Igikorwa cy'Umwuka cyarigaragazaga mu mbaraga, kandi byabagaho kenshi ko umwuka wo kwimenyaho ibyaha afata abantu afite imbaraga nk'ijo ku buryo bituraga hasi bakabura imbaraga, barira bihebye igihe babonye ibyaha byabo.

Wesley yari umugabo wihangana ku buryo bugaragara. Mu buzima bwe bwose ntiyibuka igihe na kimwe aho yaba yarigeze kumva yihebye, nibura aho byaba kimwe cya kane k'isaha. Ntiyigeze aryama amasaha arenze atandatu ku munsi. Yarazindukaga cyane kugira ngo ashobore kubwiriza uhoreye saa kumi n'imwe za mu gitondo, kandi ibi yabikoze hafi iminsi yose y'ubukozi bwe. Byamubagaho ko abwiriza akageza ku nshuro enye k'umunsi, ku bw'ibyo agera ku mpuzandengo y'ibibwirizwa birenga 800 ku mwaka.

Yagendaga mayilo ibihumbi ku ifarasi cyo kimwe n'abavugabutumwa bagendaga hose bakoranaga na we kugira ngo bamamaze Ubutumwa Bwiza hose. Ku bw'ibyo, Wesley yagendaga mayilo 4500 [Ibilometero 7000- Usabanura] ku mwaka ari ku ifarashi.

Yizeraga imbaraga y'Imana, kandi yasengeraga abarwayi afite ukwizera gukomeye, akabona ibisubizo bitangaje.

Amenshi aba amateraniro impano z'Umwuka zigaragazaga muri yo.

Wesley ntiyateganya kuzakora idini. Ni iby'ukuri ko abari bafatanyije na we bari barakoze: "Umuryango ubahuje". Wari iteraniro ry'abantu bafite ibimenyetso bigaragara byo kwera, kandi bagashaka igitanga imbaraga zako, bunze ubumwe kugira ngo basengere hamwe, bahabwe ijambo ry'impuguro, kandi kugira ngo bamwe babe maso ku bandi mu rukundo, kugira ngo bafashanye hagati yabo gukora ku bw'agakiza kabu". Ikintu kimwe gusa cyasabwaga cyari gihagije kugira ngo uwijniremo: "kuba uri umwe

muri abo" bari bafite ikifuzo cyo guhunga umujinya uzaza kandi bagakizwa ibyaha byabo. Buhoro buhoro uko igihe cyagendaga gihita, bashyizeho urutonde rw'amategeko ntarengwa yo gukurikizwa, bishyiriraho uburyo bwabo bw'imyitwarire ku bw'inyungu z'ubugingo bwabo. Wesley amenya ko hashoboraga kuzabaho nyuma yo gupfa kwe, ikintu cyo kwishyira hamwe k'idini, kandi kikarushaho gusa guhinduka ikintu gifite ishusho y'inyuma kidafite ubugingo muri cyo, kubera ko icyo gihe Umwuka yajyaga kwigendera. Avuga igihe kimwe ko atatinyaga ko izina rya "metodisiti" ryazimangatana ku isi, ahubwo ko Umwuka, ubwe, yakwigendera.

Mu gihe k'imibereho ye, yajyaga kubona ubutunzi bwinshi, ariko ntiyigeze abikora na rimwe. Ku byerekeye amafaranga, yakundaga kuvuga ati: "Muhabwe ibyo mushoboye, muzigame ibyo mushoboye, kandi mutange ibyo mushoboye." Wesley agarutse mu by'ukuri yatangazwa cyane no kubona iredi dini ritwaye uyu munsi izina rya metodisiti. Barakize - bafite ubutunzi bwinshi buteye ubwoba. Ariko ubuzima n'imbaraga bya John Wesley nta byo bafite.

Dukwiriye kumenya na none ko Wesley atigeze na rimwe ashaka kubaka umurimo ushingiye ku mwuka wo kwirema ibice, cyangwa ku idini. Ku bw'imyizerere ye, yari yarizeye inyigisho y'Arminius, ariko ntiyifuze gutandukana na bene Se mu kwizera ku bw'impamvu z'inyigisho. Yajyaga kuba umwigishwa mwiza wa Yakobo: yashingiraga Ubugingo bwe buhoraho ku kwizera n'imrimo, ni ukuvuga imibereho ye yabagaho, aho gushishikazwa no kwemera amahame ari aho yahimbwe n'abantu cyangwa inyigisho. John Wesley yatabarutse afite imyaka 88, amaze gukorera Imana ku buryo ari abantu bake bajyaga kubasha gutekerezako ko ibyo byashoboka.

## INDAMUTSO

Ibyahishuwe 3:7:

*"Wandikire marayika w'itorero ry'i Filadelfiya: uti: "Uwera kandi w'ukuri ufite urufunguzo rwa Dawidi, ukingura ntihagire ukingira kandi ukingira ntihagire ukingura."*

Yoo, mbega ukuntu aya magambo ari meza! Ko izina rye ubwaryo ku bw'ibyo ari iry'icyubahiro gikomeye! Uburyo ari ibantu bitangaje gutekereza ko ayo mazina y'ibigwi yose ashobora guhabwa umuntu umwe. Ni nde wundi utari Yesu Kristo, Umwami w'Ikuzo, watinyuka kwivugaho ibantu nk'ibyo? Ndatekereza ko urufunguzo rwatuma dusobanura dufite gihama insobanuro y'ayo magambo yagaragajwe ku buryo butangaje ruri ku murongo wa 9:

*"Dore nguhaye bamwe bo mu isinagogi ya Satani biyita Abayuda nyamara atari bo, ahubwo ari abanyabinyoma. Dore nzabahata kuza bikubite imbere y'ibirenge byawe bamenye ko nagukunze".*

Mvuze ko uyu murongo ari urufunguzo, kubera ko uvuga ku Bayuda bihaye igihe cyose izina rya "abana b'Imana", bakigizayo abandi bose. Babambye Umwami Yesu Kristo kandi baramwishe. Mu gihe k'ibinyejana byinshi, icyo gikorwa giteye bwoba cyatumye amaraso yabo bwite abarwa ku mutwe wabo. Kandi ibyo byose byatewe ni uko banze kwemere Yesu ko ari we Mesiya wabo - nyamara yari We. Mu maso yabo, ntiyari Uje, cyangwa Umwana wa Dawidi; mu maso yabo, yari Berizebuli, cyangwa se ikindi kiremwa gihumanye, rwose byarumvikanaga ko gikwiriye kurimburwa kikavaho. Ariko baribeshyaga. Rwose yari Emanweli, Imana igaragaye mu mubiri. Rwose ni we Mesiya. Ni byo rwose, neza neza Yari icyo ahamya ko ari Cyo ubu. Ni We, UWO YESU UDAHINDUKA-Yesu Kristo uko yari ari ejo, uyu munsi ni ko ari, kandi ni ko azahora ari iteka ryose. Uwera uri hagati y'ibitereko by'amatabaza ni we uwo Yesu wagendaga ku nkcombe za Galilaya, wakizaga abarwayi, wazuraga abapfuye, kandi ni We, nubwo yanyuze mu bigeragezo atashoboraga kwigobotora, arabambwa kandi aricwa. Nyamara yarazutse, kandi yicaye iburyo bw'Isumba Byose mu Ijuru riri hejuru y'amajuru.

Icyo gihe, Abayuda ntibavugaga ko Yari Uwera. Na n'ubu ntibabivuga. Nyamara, ni UWERA. Zaburi16:10 :

*"Kuko utazareka ubugingo bwange ngo buge ikuzimu, ntuzatuma Uwera wawe abona kubora kwe."*

[Bibiliya insobanuro ya Darby].

Bashakiraga ugukiranuka kwabo mu mategeko, kandi baratsinzwe bidasubirwaho, kuko ntawufite umubiri n'umwe Wabasha gutsindishirizwa n'amategeko. Nta muntu n'umwe ushobora guhinduka uwera ku bw'amategeko. Ukwera guturuka ku Mwami. 1Abakorinto 1:30:

*Ni yo ibaha kuba muri Kristo Yesu waduhindukiye ubwenge buva ku Mana, no gukiranuka no kwezwa no gucungurwa.*

Abakorinto 5:21:

*"Kugira ngo muri We duhinduke gukiranuka kw'Imana."*

Byari: guhitamo Kristo cyangwa ukarimbuka; kandi bararimbutse kuko bamwanze.

abantu b'icyo gisekuru bakoze ikosa nk'iryo, kandi ni kimwe n'ab'uyu munsi. Nk'uko Abayuda bahungiye mu muhango wo gusenga mu Isinagogi, ni na ko abantu bo mu gisekuru cya Filadelifiya na bo bahungiye mu Itorero. Icyo ngombwa si ukwifatanya n'Itorero. Ubugingo ntiburi mu itorero. Ubugingo buri muri Kristo.

"Kandi uko guhamya ni uku: ni uko Imana yaduhaye ubugingo buhoraho, kandi ubwo bugingo bubonerwa mu Mwana wayo. Ufite uwo Mwana ni we ufite ubwo bugingo, naho udafite Umwana w'Imana nta bugingo afite."

Umuntu yezwa n'Umwuka. Ni Umwuka w'Ukwera, wazuye Yesu mu bapfuye, ni we muri twe ubu, kandi akatweza ku bw'ukwera Kwe.

Nguyu, UWERA. Kandi natwe tuzahagararana na we, twambaye gukiranuka Kwe, kandi turi abera twambaye ukwera Kwe.

Nyamara, iki gisekuru ni igisekuru cya gatandatu. Mu maso y'Imana, iherezo ry'ibihe riri bugufi. Agiye kugaruka bidatinze. Bidatinze ijwi ry'urusaku rizarangurura, mu gihe cyo kuza Kwe rigira riti:

*"Uwanduye mu mutima nakomeze yandure, kandi ukiranuka agumye akiranuke, n'uwera agumye yezwe."*

Ibyahishiwe: 22.11b

Yoo! Mbega ukuntu nejejwe nuko ukwera kwange kudaturuka kuri nge ubwange! Nejejwe no kuba ndi muri Kristo, twakiriye imigabane yose yo gukiranuka kwe - yego, narayihawe. Nkaba narahawe kamere yose itangaje yo gukiranuka kwe - ni byo, narayihawe. Imana ihimbazwe iteka ryose!

"Nk'iki icyo uw'ukuri avuga." Iryo jambo: "Uw'ukuri" riratangaje rwose. Nta bwo "Uw'ukuri" bisonura gusa insobanuro ya "ufite ukuri" nk'ikinyuranyo cya "Umunyabinyoma". Rigaragaza ugusohozwa kw'igitekerezo kuzuye ukugerarinije n'ugusohozwa kwacyo kw'igice. Urugero twibutse ko Yesu yavuze muri Yohana 6:32 ati:

*"Mose si we wabahaye umutsima uvuye mu ijuru, ahubwo ni Data ubaha umutsima w'ukuri uvuye mu ijuru".*

Yohana 15;1:

*"Ndi umuzabibu w'ukuri."*

Abaheburayo

9:24 haragira hati:

*"Kuko Kristo atinjiye Ahera haremwe n'intoki hasuraga ha handi h'ukuri, ahubwo yinjiye mu ijuru ubwaho kugira ngo noneho ahagarare imbere y'Imana ku bwacu."*

1Yohana 2:8:

*"kuko umwijima ushize umucyo w'ukuri ukaba umaze kurasa."*

Ku bw'ibyo nk'uko iri jambo rivuga, nk'uko bigaragara muri iyi mirongo, ugusohozwa kuzuye tukugereranije n'igitekerezo cyo gusohozwa kw'igice, dushobora noneho gusobanukirwa kuruta mbere igitekerezo k'ishusho nyirizina tuyigereranije n'ishusho y'igicucu cyacyo, ndetse n'ik'ikintu ukigereranije n'igicucu cyacyo. Dufate urugero rwa manu yo mu Ijuru. Kuri Isirayeli, Imana yamanuye mu Ijuru umugati w'abamarayika. Ariko uwo mugati ntiyahazaga. Wari mwiza gusa ku munsi umwe. Abawuryaga barongera bagasonza bukeye bwaho. Iyo wawubikaga, waraboraga ukagwa inyo. Ariko Yesu ni umugati NYAKURI waturutse mu Ijuru, mu gihe manu yari igishushanyo gusa. Kandi niba umuntu ariye kuri uwo MUGATI uturuka mu Ijuru, ntaba azongera gusonza ukundi. Ntaba agikeneye kugaruka kuwurya. Guhera igihe yabaga awuriyeho, yabaga afite Ubugingo buhoraho. Rwose ni uko byari bimeze, IKINTU CY'UKURI GIFATIKA. Ntakongera gukenera igicucu. Ntakongera gukenera agakiza k'igice. Dufite agakiza KUZUYE. Kimwe nuko Yesu atari agace k'Imana; We NI Imana.

Nta muntu n'umwe wabasha guhakana ko Isirayeli yari ifite umucyo. Ni bwo bwoko byonyine bwari bufite umucyo nk'igihugu. Ni kimwe no muri Egiputa, igihe umwijima w'icuraburindi wari uriho ku buryo wajyaga kubasha kuwukoraho; nyamara hari hari umucyo mu mazu y'Abisirayeli. Ariko ubu, umucyo nyakuri waraje. Umucyo w'isi, ni Yesu. Mose n'abahanuzi bazanye umucyo bakoresheje Ibyanditswe byamenyeshaga ukuza kwa Mesiya. Ni kuri ubwo buryo Isirayeli yari ifite umucyo. Ariko ubu, Ugusohora kw'umucyo kwarageze, kandi ibyari Ijambo gusa ry'ikibengebenge gitukura ryitamuruye mu Mucyo w'Ubwiza bw'Imana, ugaragara mu bwoko bwayo. Mu gihe inkingi y'umuriro yatangaga umucyo njoro, -

ibyo byari byiza bitangaje, - noneho umucyo n'ubugingo byari bigaragajwe mu mwuzuro w'Ubumana mu mubiri.

Abisirayeli bafataga inyana y'igaju maze bakayitangaho igitambo ku gicaniro ku bw'impongan y'ibyaha. Mu gihe cy'umwaka ibyaha by'uwabaga aregwa ibyaha byabaga bitwikiriwe. Ariko gutwikira icyaha ntibashoboraga gukuraho inyota y'icyaha. Nta bwo cyari igitambo cyuzuye. Ibyo byari igicucu, cyagombaga kuzabaho kugeza igihe igitambo nyakuri cyajyaga kuzazira. Ku bw'ibyo, buri mwaka, umuntu yagombaga gutamba igitambo, kandi buri mwaka, yagombaga kugaruka, kubera ko igihe cyose yabaga afite inyota yo gukora icyaha. Ubugingo bw'inyamaswa bwari bufite akamaro ko kuba impongan y'icyaha cy'umuntu, ariko kubera ko amaraso yamenwe yabaga gusa ari amaraso y'inyamaswa, kandi ubugingo bwatanzweho igitambo bukaba bwarabaga gusa ari ubw'inyamaswa, ubwo bugingo ntibashoboraga kugaruka ku muntu. Kandi nubwo bwajyaga kugaruka nta cyo bwajyaga kuba bumaze. Ariko, igihe Kristo, impongan yuzuye, yatanzwe, kandi amaraso ye akamenwa, ico gihe ubugingo bwari buri muri Kristo bwagarutse ku munyabyaha wihanny, kandi, kubera ko ubwo bugingo bwari ubugingo budafite inenge bwa Kristo, bukiranuka kandi budafite icyaha, umubyabyaha yabaga ico gihe abohowe, kuko yabaga atagifite inyota yo gukora icyaha. Ubugingo bwa Yesu bwabaga bwagarutse kuri we. Ni cyo Abaroma 8:2 hasobanura:

*"Itegeko ry'Umwuka w'ubugingo bwo muri Kristo Yesu ryambatuye ububata bw'itegeko ry'ibyaha n'urupfu".*

Ariko abayuda bo mu gihe cya Yesu ntibashakaga kwemera ico gitambo. Amaraso y'ibimasa n'amasekurume y'hene ntibyagezaga na rimwe ku gutungana. Bwari uburyo bwo gukora Imana yari yashyizeho ku bw'igihe cyahise. Ariko noneho Kristo yari yaje yambaye umubiri, ico gihe, ku bw'amaraso Ye yamenwe, Yakuyeho icyaha, kandi ico gitambo yitambyeho We ubwe cyatumye tuba abantu batunganye. Abayuda ntibashatse kubyemera. Ariko se iby'iki gisekuru cya Filadelifiya byo bimeze bite? Ni byo, none se iby'ibindi bisekuru byo bimeze bite? Bemeye mu by'ukuri uko Kuri kuri muri Kristo? Oya, mugenzi. Luteri nta cyo atakoze ngo azane ukuri gushingiye ku gutsindishirizwa, Kilizya Gatolika na mukeba wayo w'iburasirazuba, Itorero ry'Abarutodogisi, ibyo ari byo byose, bakomeje kwihambirka ku mirimo. Nyamara, imirimo ni ikintu kiza, ariko ntkiza. Ntikugira intungane. Ni: Kristo, cyangwa ukarimbuka. Nta nubwo ari Kristo n'imirimo, ahubwo ni Kristo wenyinye.

Ni muri iki gisekuru hatangira igihe k'imyizerere yazanywe n'Arminius, itizeraga ko Kristo ari UW'UKURI. Ntiyaririmba indirimbo igira iti: "Nta kindi usibye Amaraso", aririmba igira iti: "Nta kindi usibye amaraso n'imyitwarire yange myiza." Nyamara, nshygikiye cyane imyitwarire myiza, niba mwarakijjwe, muzagenda mu gukiranuka, nk'uko twamaze kubibona. Ariko aho, ndababwira rwose ko agakiza, ATARI Yesu WONGWEHO ikindi kintu. Ni Yesu WENYINE. AGAKIZA GATURUKA K'UWITEKA. Uhoreye ku itangiriro ukageza ku iherezo, byose bituruka ku MANA. Ndasaba ko imibereho Ye yaba muri nge. Ndasaba ko amaraso Ye yanyeza. Ndasaba ko Umwuka We yanyuzura. Ndasaba ko Ijambo Rye ryaba mu mutima wange no mu kanwa kange. Ndasaba ko ibikomere Bye byankiza uburwayi. Ndasaba ko yaba ari Yesu, kandi Yesu wenyine. Atari ku bw'imirimo yo gukiranuka naba narakoze. Oya, mugenzi. Kristo ni we bugingo bwange. Amina.

Biroroshye ko nashobora gukomeza kubabwira iby'uko kuri ntibigire iherezo, ariko ndashaka gusa kubaha na none igitekerezo. Ni iki kigaragara muri iyi ndirimbo ihebuje ya A.B. Simpson.

"Kera Yari umugisha

Ubu, ni Umwami.

Kera nagize ibiyumvo,

Ubu, mfite Ijambo Rye.

Kera, nifuzaga impano Ze,

Ubu, Uzitanga ni We nifuza.

Kera, nashakishaga ugukira uburwayi,

Ubu, ni We wenyine nshaka.

Ni We byose muri byose iteka ryose.

Ni Yesu nzaririmba,

Byose biri muri Yesu,

Kandi Yesu ni byose."

Ico mubasha kubona cyose muri ubu buzima, cyaba kibanyuze, cyaba ari kiza kandi kinejeje ico ari

cyo cyose, ni ubusa, ariko muri Kristo, muzahabona ibintu byose by'ugutungana kwose. Byose birayoyoka kandi bigahinduka ubusa iruhande Rue.

"Ufite urufungozo rwa Dawidi." Aka gace k'interuro keza gakurikira kandi kagakomoka ku kakabanjirije kagira kati: "Uw'ukuri". Kristo, Igikorwa cyagaragaye cyuzuye, ukigereranije n'Igikorwa cyagaragaye k'igice. Rwose ni ibyo. Mose yari umuhanuzi woherejwe n'Imana, ariko Yesu (ubo Mose yari abereye igishushanyo) yari Umuhanuzi waturutse ku Mana. Dawidi (umuntu wari ufite umutima umeze nk'uko Imana ishaka) yari umwami wa Isirayeli, ariko Yesu ni we Dawidi Ukomeye : Umwami w'abami, Umutware utwara abatware, Imana ubwayo. Nyamara, Dawidi yari uwo mu rubyaro rwa Yuda, umuryango utaraturukagamo abatambyi, kandi nyamara arya imitsima yamurikiwe Uwiteka yagenewe kuribwa n'abatambyi. Yari umurwanyi ukomeye,akanesha abanzi be kandi agakomeza ubwoko bwe. Yari umwami, kandi ku bw'ubo mwanya w'icyubahiro yicara ku ntebe y'ubwami. Yari umuhanuzi. Yari igishushanyo gitangaje cya Kristo.

Nyamara bivugwa muri Yesaya 22 : 22 ngo :

*"Urufungozo rw'inz ya Dawidi nzarushyira ku rutugu rwe, ni we uzakingura ntihagire ukinga kandi ni we uzakinga ntihagire ukingura."*

Umwuka akoresha iki cyanditswe agikuye mu Isezerano rya Kera kivuga ku Mwami Yesu Kristo n'ubukozi bwe mu Itorero. Igisobanuro cy'urufungozo rwa Dawidi icyo gihe ni igicucu gusa, ariko ubu bifite ugusohora kwabyo, ige Yesu ahagaze hagati y'ibitereko by'amatabaza. Ibyo byose bivugwa ku Mwami wacu NYUMA y'izuka rye, Atari mu gihe cy'ubusuhuke Bwe ku isi. Ariko se urwo rufungozo rusobanuye iki? Igisobanuro kigaragarira aho urwo rufungozo RUHEREREYE. NTA BWO ruri mu kiganza ke. Nta bwo runagana mu ijosi Rye. Ntirwashyizwe mu biganza by'abandi bantu, iyo bitaba ibyo, uwo murongo ntiwajyaga kubasha kuvuga ko ARI WE WENYINE UFITE UBUSHOBOZI BWO GUKORESHA URWO RUFUNGUZO, KUKO WE WENYINE NI WE UKINGURA, KANDI AGAKINGA, KANDI NTA MUNTU N'UMWE ufite ubwo burenganzira, usibye Yesu ubwe. Si iby'ukuri? Ariko se urufungozo ruri he? RURI KU RUTUGU RWE. Ariko se kubera iki URUTUGU? Nimusome Yesaya 9.6 haragira hati:

*"Ubutware buzaba ku bitugu bye."*

[Bibiliya insobanuro ya Darby. - Usobanura] Ibyo bisobanuye iki? Dore igisobanuro: imvugo : *"ubutware ku bitugu Bye"* rituruka ku muhango wo gushyingira, nk'uko ukorwa mu gice k'Iburasirazuba. Mu gihe umugenahawehumukwe, umugenahukuraho agatimba ke kari kamutwikiriye, maze akagashyira ku ntugu z'umukwe. Icyo gikorwa ntigisobanura gusa ko yicisha bugufi akaba agiye munsi y'ubuyobozi bwe - ni ukuvuga ko amweguriye uburenganzira bwe bwite - ko abaye umutware, kandi na none ko afashe inshingano, ko azita ku mugeni kandi ko WE KANDI WE WENYINE - NTA WUNDI MUNTU - NTA WUNDI MUGABO - NTA BUNDI BUTWARE - BUFITE UBURENGANZIRA NA BUMWE CYANGWA INSHINGANO N'IMWE KURI WE. Kandi URUFUNGUZO rwa Dawidi, bakundwa, ni urwo. Kubera ko Yo yigenga, Imana, ku bw'itegeko ry'Imana, yari izi neza bidashidikanywaho uhoreye mbere abazaba abagize Umugenahayo. Yaramutoranje. Nta bwo ari umugenahumatoranje. Yaramuhamagaye. Nta bwo ari we wizanye. Yaramupfiriye. Yamwogesheje amaraso Ye bwite. Yishyuye ikiguzi ku bwe. Ni uwe kandi ni uwe wenyine. Ni uwe burundu, kandi Yemeye inshingano yabyo. Ni Umutware we, kuko Kristo ari Umutware w'Itorero Rye. Nk'uko Sara yitaga Aburahamu "Umutware" ni ko umugenahanejeje n'uko ari Umutware we. Aravuga, na we akumvira, kuko ibyo bimutera umunezero.

Ariko se abantu bitondeye uko kuri? Bahaye agaciro Ubumuntu Bwe Uwo, We wenyine, ni We ufite Ubutware yigengaho ku Itorero Rye? Ndavuga nti: "OYA". Kuko muri buri gisekurero, Itorero ryagiye riyoborwa n'inzego z'ubuyobozi - n'itsinda ry'abayobozi b'Itorero - ruhererekane rw'abakuru bashyirwa mu kimbo k'intumwa - uwo yakingaga umuryango w'ubuntu n'uw'imbabazi k'uwo yashakaga, kandi we, aho gusohoza inshingano y'Itorero mu rukundo, yahinduye Itorero akarima ke, kandi yararishenye mu mikorere ye y'ubucanshuro. Abari mu nzego z'ubuyobozi bw'itorero biberagaho mu buzima buhenze badamaraye, mu gihe Itorero ryo kubabarirwa ryabaga rifite gutungwa gusa n'udusigazwa babaga basigiwe mu guhohoterwa. Kandi ibisekuru byose byakoze ibintu nk'ibyo. Buri kimwe kiyikoreje umutwaro w'idini, rigaha ubuyobozi abantu kandi rikegurira ubwo buyobozi Leta. Niba abantu batinyutse kuzamura umutwe, bakoreshaga imbaraga kugira ngo babaceckeshe, cyangwa bakababohera kure bakaba ibicibwa. Buri dini riyobowe n'umwuka nk'ubo. Buri dini ryose rirahira ko ari ryo rifite urufungozo rw'ubuyobozi bw'Itorero. Buri dini ryose rivuga ko ari ryo rikingura urugi. Ariko si iby'ukuri. Ni Yesu, kandi Yesu wenyine. Ni We ushyira ingingo mu Mubiri. Ni we uhagurutsa ubukozi hagati muri bo. Afata impano ze akaziha umugenahanejeje We kugira ngo azikoreshe. Amwitaho, kandi akamuyobora. Ni uwe gusa wenyine, nta wundi afite.

Mbega uburyo Itorero ry'iki gisekuru turimo riri kure y'ukuri. Kandi bidatinze umunsi uraje aho abantu ndetse bavuga ko bavuga mu izina ry'Itorero bazahaguruka mu mpuza madini, kugira ngo bashyireho antikristo abe umutwe w'amadini yabo ari umuntu w'inyama n'amagufwa, antikristo uzareka Umwami. Kandi Kristo, We tuzamusanga hanze y'Itorero agira ati :

*"Dore mpagaze ku rugi, ndakomanga. Umuntu niyumva ijwi ryange agakingura urugi, nzinjira iwe dusangire."*

Ibyahishuwe 3 :20.

Ariko nimunyemerere mvuge ibi: ntiwavuga ko Umwami wacu ajya atsindwa. Abantu bavuga ko bakingurira Imana urugi, kandi bagakinga urwo rugi, ariko ni abanyabinyoma. Abo Data yamuuhaye bose bazaza aho Ari, kandi uje kuri We ntazasubizwa inyuma na gato. NTA N'UMWE muri bo azazimiza. Yohana 6 :37-39. Kandi, igihe urugingo rwa nyuma rwatoranijwe rw'Umubiri wa Kristo ruzaba rwinjiye, icyo gihe Umwami wacu azahera ko agaragare.

Urufunguzo rwa Dawidi. Dawidi ntiyari umwami wa Isirayeli, wa Isirayeli yose? Kandi Yesu si umwana wa Dawidi, kubera ko azicara ku ntebe y'ubwami ya Dawidi mu gihe k'imyaka igihumbi, kandi Akazatwara kandi akima ingoma mu murage We? Ni iby'ukuri nta gushidikanya. Ku bw'ibyo, urufunguzo rwa Dawidi bisobanura ko Yesu ari We uzashyiraho ubwami bw'imyaka igihumbi. Ni we ufite imfunguzo z'urupfu n'iz'ikuzimu azazura abe kugira ngo bahabwe umugabane ku ngoma Ye yo gukiranuka ku isi.

Mbega ukuntu ari byiza bitangaje kumenya ko mu Mwami wacu ari ho hari ibisubizo byose. Mu by'ukuri ni muri We amasezerano yose y'Imana asohorera. Mu by'ukuri igehe turi MURI We ni bwo tuba turi abaragwa b'ibyo yaronse ku bwacu.

Ni byo, Ngusu, Umwami w'Ikuzo. Mbere, nka Data, yari agoswe n'abamarayika, ingabo z'abamarayika, Abakerubi, Abaserafi hamwe n'ingabo zose zo mu Ijuru bateraga hejuru n'ijwi rirenga bavuga bat: "Uwera, Uwera, Uwera ni Uwiteka, Imana Nyiringabo!" Ukwera kwayo kwari ku buryo nta muntu n'umwe washoboraga kuyegera. Ariko ubu turayibona mu itorero, isangira natwe ukwera kwayo bwite, ku buryo muri Yo ndetse twahindutse ugukiranuka kw'Imana. Ni byo, kandi nguwo ari aho: Yesu, Ukiranuka muri byose-Umwangange wo mu kibaya, Inyenyeri yaka yo mu Ruturuturu, Umwiza mu bantu inzovu, Uwa mbere akaba n'Uw'imperuka, Igishyitsi n'Urubyaro rwa Dawidi, Data, Umwana n'Umwuka Wera- Ni We byose muri byose.

Yesaya 9:5 agira ati :

*"Nuko Umwana yatuvukiye, duhawe Umwana w'umuhungu, ubutware buzaba ku bitugu Bye, azitwa Igitangaza, Umuhyanama, Imana ikomeye, Data wa twese uhoraho, Umwami w'amahoro."*

Muri We harimo uguohora kw'ibintu byose kuzuye. Nubwo habayeho igehe tutari dufite icyo tumukorera, ubu noneho turamukunda n'umunezero utagira akagero kandi uhebuje. Ahagaze hagati mu Itorero, kandi tuzaririmba ishimwe Rye, kuko We, ari Umunyembaraga Unesha, akaba n'Umutware w'Itorero ari ryo Mugeni We. Yacunguye uwo Mugeni. Ni uwe. Ni uwe, kandi We wenyine, kandi amwitaho. Ni Umwami wacu, natwe turi ubwami Bwe, ubutunzi Bwe buhoraho iteka ryose.

Nyamara, muribuka ko ku itangiriro ry'umurongo wa 7, navuze ko umurongo wa 9 wadufasha kuwusobanukirwa. Ndatekereza ko mwabonye icyo nashakaga kuvuga. Yesu yigaragaje nk'Uwera, uw'ukuri (cyangwa se icy'ukuri kimwe rukumbi), ufite urufunguzo rwa Dawidi, ukingura kandi agakinga. Kandi ni ukuri nyirizina. Ayo magambo aramugaragaza ku buryo butunganye. Ariko Abayuda b'icyo gihe baramwanze, We n'icyo yari Cyo cyose. Banze Umukiza wabo, n'icyo Yari Cyo cyose kuri bo. Kandi Abakristo kw'izina bakoze ikintu nk'icyo uyu munsi. Bakoze neza neza kimwe n'Abayuda.

Abayuda bari baramubambye kandi hanyuma bari baradukiriye abizera nyakuri. Abakristo b'izina barongeye baramubamba, kandi bagabaga ibitero ku Itorero ry'ukuri kugira ngo barisenye. Ariko Imana ni iyo kwizerwa, kandi Uri hejuru ya byose azagaruka. Icyo gihe Azerekana Umwami Nyiri imbaraga uwo ari We. Kandi rwose icyo gihe azagaragariza isi icyo We ari cyo, kandi icyo gihe isi yose uko yakabaye izapfukama imbere y'ibirengre Bye, isi yose uko yakabaye na none icyo gihe izapfukama imbere y'ibirengre by'abera, Agaragaze ko abera bari bafite ukuri mu gihagararo bagize bajya mu ruhande Rwe. Imana ihimbazwe iteka ryose!

## **IGISEKURU CY'URUGI RUKINGUYE**

Ibyahishuwe 3.8:

*"Nzi imirimo yawe. Dore, nshyize imbere yawe urugi rukinguye, kandi nta we ubasha kurukinga, kuko ufite imbaraga nke, nyamara ukitondera Ijambo ryange, ntiwhakanye izina ryange [Bibiliya insobanuro ya Darby. - Usobanura.]*

Agace k'interuro kabanza k'uyu murongo karagira kati: "Nzi imirimo yawe", karasesenguwe mu gice gisigaye cy'umurongo, kuko imirimo yabo ifite icyo ihuriyeho na "urugi rukinguye", "imbaraga nke," "Ijambo n'Izina"

Uburyo bwo gusobanukirwa ubutunzi bwose buri muri aya magambo ni ubu: "Dore, nshyize urugi

rukinguye imbere yawe umuntu wese adashobora gukinga" noneho tugomba kwibutsa ko buri gisekuru kigenda buhoro buhoro kinjira mu kindi gikurikira. Nta gisekuru na kimwe cyahise kirangira ako kanya, kandi nta na kimwe cyatangiriye igithe twavuga kizwi neza, ahubwo urebye, buri kimwe cyaragendaga kikazimirira mu gikurikiyeho ku buryo butagaragara. Icyuhu kiri hagati y'iki gisekuru n'igikurikiyeho kirakomeza. Iki gisekuru ntigikomereza gusa mu gisekuru cya nyuma, ahubwo ubirebye neza, igisekuru cya nyuma gusa usanga ari icya gatandatu gikomerezaho. Igisekuru cya karindwi (igisekuru kigufi cyane) gihuriza hamwe imbaraga zacyo ku bw'umurimo wihuse: ibibi byose byo muri buri gisekuru bizaba bikrimo, kandi nyamara n'ukuri kose kwa Pantekote kuzaba kukrimo. Igihe igisekuru cya Filadelifiya kigeze hafi ku ihirezo ryacyo, igisekuru cya Lawodikiya gihita kiza vuba na bwangu kigatuma urukungu kimwe n'ingano byera kugira ngo bisarurwe:

*Mabanze muteranye urukungu muruhambire imitwaro rutwikwe, maze ingano muzihunike mu kigega cyange." Matayo 13:30.*

Ndabinginze mugumane mu bitekerezo ko igisekuru cya Sarudi cyaranze n'itangira ry'ubugorozi, kandi ko ubwo bugorozi bugomba gukomeza bukageza igithe impeke y'imbuto yatewe kuri Pantekote iba ishoje igithe cyo gukura kwayo kose, kuba yaratewe, ikuhirwa, igafumbirwa, n'ibindi, ikageza igithe yereye imbuto isa n'iya mbere y'umwimerere. Muri icyo gihe, urukungu rwabibwe na rwo rugomba kunya mu bihe byarwo byo gukura, kandi na rwo rugasarurwa. Ibyo neza neza ni byo tubona bibaho. Mutekereze gusa ku bihe by'ihinga, na none muzabona igishushanyo gishushanya ibyo byose neza neza uko byakabaye. Ikimera mwabonye gikura gifite imbaraga kihuta mu gihe k'impeshyi rugahita rutangira kuzana impeke. Nta bwo wabasha kuvuga igithe icyari cyo nyakuri igithe umuhindo wasimburiye impeshyi - ugusimburana kwabayeho ku buryo utarabukwa. Ni nako bimeze ku bisekuru by'itorero, kandi by'umwihariko kurushaho kuri ibi bibiri bya nyuma.

Ni muri iki gisekuru Yesu yavuze ati: "Ndaza VUBA" (umurongo wa11) Igisekuru cya nyuma rwose ni kigufi cyane. Lawodikiya ni igisekuru cy'umurimo wihuta. Ni igisekuru cyagabaniwe.

Noneho tugiye by'umwihariko kuvuga birambuye ku RUGI RUKINGUYE, rwo umuntu atabasha gukinga. Ndashaka mbere na mbere gukuraho igitekerezo cyange ku bijyanye n'urugi rukinguye nshaka kuvuga umuhate ukomeye w'ivugabutumwa ry'abamisiyoneri ryo muri iki gisekuru. Pawulo yitaga: "Urugi rukinguye" inkubiri nshya y'ivugabutumwa ry'abakozi b'Imana bagenda hose bakorera Umwami. 2 Abakorinto 2:12:

*"Ubwo nazaga i Tirowa nzanywe no kubwiriza ubutumwa bwiza bwa Kristo, nubwo nakinguriwe urugi n'Umwami wacu.*

Ku bw'ibyo, tugereranije Ibyanditswe, turabona ko urwo rugi rukinguye rusobanura ukwamamaza Ubutumwa Bwiza kutigeze kubaho mu isi ku kigero nk'icyo.

Nashakaga kubereka ikintu runaka hano. Ku Mana, ibantu bikorerwa mu mubare gatatu, si ko biri? Ni mu gisekuru cya gatatu, igisekuru cya Perugamo, ni bwo Itorero "Ryabaye umwe" na Leta. Imirimbo y'Abanikolayiti yari yahindutse inyigisho z'Abanikolayiti. Icyo gisekuru cyari URUGI RUKINGUYE ku muzabibu w'ikinyoma. Kimaze gushygikirwa n'imbaraga za Leta, cyahise gihinduka ikintu k'imikorere y'isi, nubwo cyari gifite izina ry'ubukristu. Icyo gihe cyahise gikwirakwira hose nk'ifu itumuwe n'umuyaga. Arikoneho, ibisekuru bitatu nyuma y'aho, nyuma y'intambara ndende kandi ikomeye yo kwizera, haboneka URUGI RUKINGURIWE ukuri. Ijambo ry'Umwami noneho ryahawe rugari. Ni byo rwose, igisekuru cya gatanu cyari cyateguye inzira z'yo nkubiri ikomeye, kubera ko cyari igisekuru cyo kugenda ibihugu no kubimenya, igithe cy'ubukoloni, k'ivumburwa ry'icapiro ry'ibitabo, n'ibindi.

Uburyo biba byarabaye byiza bitangaje iyo uwo "muryango ufunguye" uba warakurikiwe n'urugero rw'ikitegererezo k'Imana rwo kuri Pantekote, tubwirwa mu Baheburayo 2 :1-4 :

Ni cyo gituma dukwiriye kurushaho kugira umwete wo kwita ku byo twumvise, kugira ngo tudatembanwa tukabivamo. Mbese ubwo ijambo ryavugiwe mu kanwa k'abamarayika ryakomeye, kandi ibicumuro byose no kutaryumvira bikiturwa ingaruka ibikwiriye, twebweho tuzarokoka dute nitwirengagiza agakiza gakomeye gatyo, kabanje kuvugwa n'Umwami wacu natwe tukagahamirizwa n'abamwumvise, Imana ifatanije na bo guhamya ihamirisha ibimenyetso n'bitangaza n'imirimbo ikomeye y'uburyo bwinshi, n'impano z'Umwuka Wera zagabwe nk'uko yabishatse ?" Nyamara, muzi ko aho ari rwo rugero rwo gukurikizwa, kuko Yesu ubwe yabihamije.

Mariko 16.15-20:

*Arababwira ati: "Muge mubihugu byose, mwigishe abaremwe bose ubutumwa bwiza. Uwizera akabatizwa azakizwa, ariko utizera azacirwaho iteka. Kandi ibimenyetso bizagumana n'abizera ngibi: bazirukana abadayimoni mu izina ryange, bazavuga indimi nshya, bazafata inzoka, kandi nibanywa ikintu kica nta cyo kizabatwara na hato, bazarambika ibiganza ku barwayi bakire." Nuko Umwami Yesu amaze kuvugana na bo,*

*ajyanwa mu Ijuru yicara iburyo bw'Imana. Abo barasohoka bigisha hose, Umwami Yesu ari kumwe na bo abafasha, akomerasha ijambo rye ibimenyetso byagendanaga na ryo. Amina!*

Nta bwo yababwiye ngo bage ku isi hose bubake amashuri ya Bibiliya; nta nubwo yababwiye ngo bage ku isi hose gukwirakwiza inyandiko. Ibyo bintu ni byiza, ariko icyo Yesu yababwiye gukora, ni UKUBWIRIZA UPUTUMWA BWIZA - no guhagarara bashikamye ku IJAMBO - kandi icyo gihe, ibimenyetso byajyaga gukurikiraho. Igihe yohereje abo cumi na babiri icyo gihe ni bwo tubona bwa mbere uko ubwami bw'Imana bugomba kubwirizwa. Muri Matayo 10:1-8, yabahaye ubutumwa n'amabwiriza akurikira:

*"Ahama gara abigishwa be cumi na babiri, abaha ubutware bwo kwirukana abadayimoni no gukiza indwara zose n'ubumuga bwose.*

*Amazina y'intumwa cumi n'ebyiri ni aya: uwa mbere ni Simoni witwaga Petero na Andereya mwene se, na Yakobo mwene Zebedayo na Yohana mwene se,*

*na Filipo na Barutolomayo, na Toma na Matayo umukoresha w'ikoro, na Yakobo mwene Alufayo, na Tadayo*

*na Simoni Zelote, na Yuda Isikariyota ari we wamugambaniye.*

*Abo cumi na babiri Yesu arabatuma abategeka ati: "Ntimuzage mu bapagani cyangwa mu midugudu y'Abasamariya,*

*ahubwo muge mu ntama zazimiye z'umuryango wa Isirayeli.*

*Nimugende mwigisha muti: 'Ubwami bwo mu ijuru buri hafi.'*

*Mukize abarwayi, muzure abapfuye, mukize ababembe, mwirukane abadayimoni. Mwaherewe ubuntu, namwe muge mutangira ubundi."*

Mu by'ukuri ubukozi yabahaye bwari ubukozi Bwe bwite, ni bwo Yasangiye na bo kuko muri Matayo 9:35-38 havuga hati:

*"Yesu yagendaga mu midugudu n'ibirorero byose yigisha mu masinagogi avuga ubutumwa bwiza bw'ubwami akiza indwara zose n'ubumuga bwose.*

*Abonye abantu uko ari bensi arababarira, kuko bari barushye cyane basandaye nk'intama zitagira umwungeri.*

*Maze abwira abigishwa be ati: "Ibisarurwa ni byinshi ariko abasarazi ni bake nuko rero mwinginge nyiri ibisarurwa yohereze abasarazi mu bisarurwa bye."*

Nyamara, abantu bensi batekereza ko intumwa ari zo zonyine zahawe ubwo bukozi n'Umwami wacu Yesu, kandi ko ku bw'ibyo ubwo bukozi bwarangiye igahe zapfuye. Ibyo nta cyo bivuze. Muri Luka 10:1-9, turabona ko, igahe yari ari hano ku isi, yari yaratangiye guha abe ubukozi bw'imbaraga:

*Hanyuma y'ibyo Umwami Yesu atoranya abandi mirongo irindwi, atuma babiri babiri ngo bamubanzirize, bage mu midugudu yose n'aho yendaga kujya hose.*

*Arababwira ati: "Ibisarurwa ni byinshi ariko abasarazi ni bake, nuko mwinginge nyiri ibisarurwa ngo yohereze abasarazi mu bisarurwa bye.*

*Nimugende, dore mbatumye mumeze nk'abana b'intama hagati y'amasega.*

*Ntimujyane uruhago rurimo ifeza, cyangwa imvumba, cyangwa inkweto, kandi ntimugire uwo muramutsa muri mu nzira.*

*Nimujya mugira inzu yose mwinjiramo, mubanke muvuge muti: 'Amahoro abe muri iyi nzu.'*

*Niba harimo umunyamahoro, amahoro yanyu azaba kuri we. Natahaba, amahoro yanyu azabagarakira.*

*Kandi iyo nzu abe ari yo mugumamo, musangire na bo ibyokurya n'ibyokunywa, kuko umukozi akwiriye guhembwa. Ntimuzacumbukure mu nzu ngo muraraguze.*

*Kandi umudugudu wose mujyamo bakabakira murye ibyo babahaye,*

*mukize abarwayi bawurimo mubabwire muti: 'Ubwami bw'Imana burabegereye.'*

Ni nde wajyaga gutinyuka guhakana ubukozi bw'imbaraga bwa Filipo? Ni nde wajyaga gutinyuka guhakana ubukozi bw'imbaraga bwa Irene, bwa Martin, bwa Colombia, bwa Patrick, n'ubw'abandi bensi umuntu atarondora bari bafite ugusigwa kw'Imana kuri bo?

Ni byo, ni muri Bibiliya ubwayo dusanga inzira igaragaza ukuri k'urugi rukinguye. Kandi nifuzaga kongera ubuhamya bwange kuri bwo. Impamvu inteye kubikora, ni uko mbasha kuvuga gusa nshize amanga ibyo Imana yakoze mu buzima bwange bwite. Niba mushaka rwose kwihanganira ukuntu mbibona ku giti cyange uwange hano, nababwira igituma menya nta gushidikanya ko Yesu adahinduka uko yari ari ejo, ari ko ari uyu munsi, kandi ko ari ko azahora ari iteka ryose, kandi ko imbaraga y'Imana na n'ubu ihari yiteye guhabwa abashaka kuyizera no kuyakira.

Igihe nari mu rugendo rwange rw'ivugabutumwa muri Afurika y'Epfo, Imana yahaye umugisha cyane urwo rugendo ku buryo, ige nageze i Durban, ahantu hamwe hashoboraga kwakira abantu bose, hari ahantu hanini cyane hagenewe kubera amasiganwa, ni ho hakabiri mu isi mu bunini. Imbaga y'abantu yarengaga kure abantu 100 000. Ku bwo kubahiriza itegeko n'umutekano w'igihugu, bari bashyizeho za bariyeri zitandukanya amoko y'abantu anyuranye. Amajana y'abapolisi yacungaga umutekano. Abo bantu bashonje bari bagenze za mayilo zitabarika. Umwamikazi wari waturutse muri Rodeziya, aherekejwe na galiyamoshi ifite zarukururana 27 ikurura zuzuye abaturage b'abirabura. Abantu bahageraga, bigoye bazamutse imisozi kandi banyuze mu nzitane z'amashyamba, bagenze za mayilo na za mayilo bahetse mu migongo yabo bamwe mu babo babaga bakeneye ubufasha. Igihugu cyose gitangazwa n'imrimo ikomeye yagaragajwe ku bw'Umwuka Wera.

Igicamunsi kimwe, ige nari ntangiye gahunda yange yo gusengera abarwayi, umugore w'umuyisilamu azamuka imbere ku gicaniro (hari hari ibihumbi by' abayisilamu bari baraho muri iry teraniro). Mu gihe yari ahagaze imbere yange, umumisiyoneri wakoreraga mu bayisilamu atangira gutakambira Umwami yinginga bucece agira ati: "Yoo! Ku bw'ubu bugingo bw'agaciyo gakomeye! Yoo! Ku bw'ubu bugingo bw'agaciyo gakomeye. Yari amaze imyaka myishi muri icyo gihugu, kandi dushingiye ku buhamya bwe bwite, yari yarigeze kubona umuyisilamu UMWE GUSA aza imbere kugira ngo yakire Yesu Kristo nk'Umukiza we. Ni abantu bakomoka ku Bamedi n'Abaperesi, amategeko yabo ni adahinduka. Mu by'ukuri ni abantu bagoye kugira ngo ubaronke. Bisa naho bafite ihame rigira riti: "Ubaye umuyisilamu umunsi umwe, uba ubaye umuyisilamu ige cyose" ni ihame ryabaye itegeko iwabo.

Rwose, ige uwo mugore yari ahagaze imbere yange, ntangira kumubwira nifashijije abasemuzi, we n'ibihumbi by'abayisilamu bari bari aho. Ndavuga nti: "Ese si iby'ukuri ko abamisiyoneri bababwiye ibya YESU waje kubakiza?" Mwakagombye kubona uko abantu barebanaga ige mvuze ibyo. Bansubiza ko ibyo ari ukuri; nuko, ndakomeza kandi ndababwira nti: "Ariko se abamisiyoneri babasomeye muri iki Gitabo (nzamura Bibiliya yange kugira ngo babashe kuyibona) ko uwo Yesu yari umunyembaraga ukiza uburwayi, kandi ko Yajyaga kuzaba mu bwoko Bwe mu bisekuru byose kugeza umunsi Yajyaga kuzagarukiraho na none kubajyana? Bababwiye ko uwo Mwuka wari uri muri Yesu Yari ari muri bo, kandi ko kubera iyo mpamvu, bashobora gukora imrimo ikomeye nk'iyo Yesu yakoraga? Bababwiye ko mubasha gukira indwara kimwe n'uko mushobora gukizwa? Ni bangahe muri mwe bifuza kubona uwo Yesu amanuka hagati yacu, kandi agakora nk'ibyo yakoze ige yari ari ku isi, hashize ige kirekire cyane?" Bose barabyifuzaga. Icyo ni cyo kintu kimwe rwose bose bari bahurijeho bakakemera.

Narakomeje nti: "Niba Yesu, ku bw'Umwuka We, akoze ibyo Yakoze ige yari ari ku isi, noneho mwakwizera Ijambo Rye?" Kandi uwo mugore w'umuyisilamukazi yari ari aho, imbere yange. Umwuka atangira kunkoreramo.

Ndamubwira nti: Muzi neza ko ntabazi. Ndetse sinzi n'ururimi rwanyu." Arikiriza. Ndavuga nti: "Ku byerekeye ibyo kubakiza uburwayi, muzi ko ntabishobora. Ariko mwumvise ubutumwa kuri iki gicamunsi, kandi mwumvise neza ibyo navuze." Umusemuzi we w'umuhinde ambwira ko ansubije ko: yari yabyumvise, kuko yari yarasomye Isezerano Rishya.

Nyamara, abiysilamu bakomoka kuri Aburahamu. Bizera Imana imwe. Ariko ntibemera Yesu ko ari Umwana w'Imana, kandi bagashyira mu mwanya we Muhamadi, ari na we bafata nk'umuhanuzi w'Imana. Bahakana ko Yesu yatzutse nyuma yo gupfa Kwe. Ibyo ni byo abayobozi b'idini babo babigisha, kandi barabyizerwa.

Ndavuga nti: "Ariko mu by'ukuri Yesu yarapfuye kandi yarazutse. Yohereje Umwuka We ku Itorero. Uwo Mwuka wari uri muri We ni wo Mwuka uri mu Itorero uyu munsi; Afite ububasha bwo gukora nk'ibyo Yesu yakoze, kandi Azabikora. Yaravuze muri Yohana 5:19 ati:

*"Umwana nta cyo abasha gukora ubwe, atabonye Se agikora; kandi ibyo Se akora byose, n'Umwana ni byo akora."*

Ku bw'ibyo, niba Yesu aje akampishurira uburwayi bwawe ubwo ari bwo, cyangwa se impamvu itumye muri hano - niba abasha kumbwira ejo hashize hanyu uko hari hameze, icyo gihe mwabasha rwose kwizera ibyerekeye iby'ejo hazaza, si ko biri?"

Aravuga, akoresheje umusemuzi ati : "Ni byo."

Ndavuga nti : "Ni byiza cyane, Abasha kuvugana nange."

Abo Bayisilamu bari bari aho bitegerezanya ubwitonzi batuje. Bose bari bahanze amaso imbere kugira ngo barebe uko biri bugende.

Nuko, Umwuka Wera aravuga: "Umugabo wawe ni umuntu mugufi w'ibigango; afite ubwanwa bwo hejuru y'umunwa bwirabura. Mufite abana babiri. Hashize hafi iminsi itatu, mugije kureba muganga kandi yarabasuzumye. Mufite ikibyimba muri nyababyeyi."

Yubika umutwe maze aravuga ati: "Ni iby'ukuri."

Ndamubaza nti: "Ni buryo ki mwaje kundeba, ndi umukristu? Kubera iki mutagiye ku muhanuzi wanyu w'umuyisilamu?"

Aravuga ati: "Ndatekereza ko mubasha kumfasha."

Ndamusubiza nti: "Ngewe sinabasha kugufasha, ariko niba wakiriye Yesu Kristo nk'Umwami n'Umukiza wawe, icyo gihe We, uri hano ubu muri aka kanya, kandi akaba azi byose kuri wowe, Ari bugufashe."

Aravuga ati: "Nemeye Yesu nk'Umukiza wange." Kandi ngibyo. Yarakize, kandi hafi abayisilamu ibihumbi icumi baje kuri Yesu uwo munsi, kubera ko Ubutumwa Bwiza bwari bwabwirijwe. atari mu magambo gusa, ahubwo no mu mbaraga. Imana ntiyigeze na rimwe ibwira umuntu ngo akore igihe k'imyaka mirongo itatu kugira ngo azasarure ubusa. Yaduhaye umuryango ukinguye w'Ijambo n'u'Imbaraga, kandi dusabwa kubikoresha neza. Ibyo ni byo byahaye Pawulo ubukozi bukomeye kandi bw'ingirakamaro. 1Abakorinto 2:4:

*"Ni ibyo navugaga nkabwiriza ntibyari amagambo y'ubwenge yo kwemeza abantu, ahubwo byari ibigaragaza Umwuka n'imbaraga."*

Noneho, nimwuve neza. Ni muri icyo gihe cy'urwo rugendo, igihe nari mfashe indege ngiye i New Salisbury, muri Rodeziya (Zimbabwe y'ubu - Usabanura.), ni bwo nabonye itsinda ry'abantu bane bafite impapuro z'inzira zo muri Amerika. Nagendaga mbasanga, nuko ndababwira nti: "Muraho, ndabona mufite impapuro z'inzira zo muri Amerika. Muri mu rugendo?"

Umusore aransubiza ati: "Oya, twese turi abamisiyoneri inaha.

Ni byiza, ndavuga nti: "Murigenga, cyangwa se mukora mu rwego rw'idini?"

Turi Abametodisiti. Duturuka i Wilmore, muri Kentucky." Ni ko yavuze.

Rwose, ndavuga nti: "Yooo! Ni hafi y'iwange!

None se, ntimwaba muri wa Mwene Data Branham uturuka neza neza aho hantu?"

Ndabasubiza nti: "Yego, rwose ni byo." Ibyo byatumye asuhererwa. Ntiyongeye gushaka kugira irindi jambo avuga - byasaba ko wabona uburyo barebanaga, we n'abakobwa batatu bari bamuherekeje. Nuko, ndavuga nti: "Ihangane umunota umwe, muhungu wange; nifuzaga kuvugana namwe, mwese, ku bintu bimwe bya ngombwa byo kugenderwaho, kubera ko twese turi Abakristu kandi tukaba turi hano ku bw'umurimo ukomeye. Mumaze kumbwira ko muri hano, mwese uko muri bane, mukaba mumaze imyaka ibiri. Mushobora guhamya, mu Izina rya Yesu, ko mushobora kwerekana ubugingo bumwe muzi mwaba mwaragejeje ku Mwami?" Ntibabishoboraga.

Sinifuzaga kubakomeretsa, bakobwa, ariko mvuga, mwakagombye kuba muri mu rugo, murimo gufasha ababyeyi banyu uturimo two gusukura ibyo mu rugo. Nta ho muhuriye no gukora umurimo w'ivugabutumwa, usibye kuba mwarujujwe Umwuka Wera kandi mukabwiriza Ubutumwa Bwiza bw'ukuri ku bwo kwigaragaza kw'imbaraga y'Umwuka Wera. Niba mutabona ibantu bigaragara Yesu yavuze ko mwajiyaga kuzabona ni uko mutabwiriza Ubutumwa Bwiza bw'ukuri."

Dutere intamwe tuge kure cyane, ngiye kubereka igishobora kubaho mu ngendo z'ivugabutumwa. Simvuze ko byose bigenda bityo, ariko ni ngombwa kumenya ko akensi ari ko bigenda. Umunsi umwe, ndi muri urwo rugendo, nasuraga Durban ndi kumwe n'umuyobozi w'umugi, nuko mbona umuturage w'umwirabura wari ufite akantu k'akarango gafashe ku ijosi, kandi agendana ikigirwamana. Nuko mbaza inshuti yange impamvu y'ako karango; ansubiza ko iyo umwirabura yahindukaga Umukristo, bamushyiragaho akarango. Mu by'ukuri naratangaye cyane, kuko twari dufite umuntu aho wavugaga ko ari Umukristo-kandi wagandanaga ikigirwamana. Nuko mbaza ukuntu ibyo byashoboka.

Arambwira ati: "Nshobora kuvuga ururimi rwe. Reka tugende tuvugane na we."

Rero twagiye, Nuko umuyobozi w'umugi ambera umusemuzi. Nabajije uwo muturage w'umwirabura niba ari Umukristu. Arabihamya. Mubaza na none impamvu yari atwaye icyo kigirwamana, niba ari Umukristu. Avuga ko yagikuye kuri se umubyara, ko ari we wakigendanaga akaza kukimusigira. Igihe mubwiye ko nta Mukristu ugomba kugendana ikigirwamana, yansubije ko icyo kigirwamana cyagiriye se akamaro gakomeye cyane. Namabajije ako kamaro ari ko. Avuga ko umunsi umwe se, atewe n'intare,

acana umuriro, kandi akabwira ikigirwamana nk'uko umupfumu yari yarabimwigishije: intare ikagenda. Mubwira ko icyo gihe ari umuriro wari wirukanye intare, kubera ko inyamaswa zose zo mu gasozi zitinya umuriro. Sinzibagirwa na rimwe igisubizo yansubije. Aravuga ati: "Rwose, dore: niba Amoyah (Umwuka) ananiwe, icyo gihe iki kigirwamana kizabishobora."

(Ushobora kubona inkuru irambuye y'ibyabaye muri urwo rugendo rw'ivugabutumwa muri Afurika mu gitabo kitwa: "A Prophet visits Africa" (Umuhanuzi asura Afrika. -Usobanura.)

Rwose icyo ni cyo imbaraga y'abakristu batabarika imbaraga ishingiyeho, kubera ko batakiriye Ijambo ku bw'urugi rukinguye rw'umwimerere, rukomoka kuri Pantekote.

Ariko reka tugaruke ku rugi rukinguye ku byerekeye igikorwa k'ivugabutumwa ry'abamisiyoneri, ryo mu gisekuru cya Filadelifiya. Iki gisekuru nticyagize urugi rukinguye rufite imbaraga rwakagombye kugira. Nimurebe ko muri uwo aho Igaragaza urwo rugi rukinguye, Iravuga Iti: "Ufite intge nke." Ni iby'ukuri. IMBARAGA y'umwuka ntayari ihari muri icyo gisekuru. Ijambo rwose ryari ryarabwirijwe. Nta gushidikanya ko ryashoboraga kubahindura abanyabwenge bakagera ku gakiza. Ariko imbaraga ikomeye y'Imana, igaragaza imirimo yayo ikomeye, ndetse ikagaragaza n'ukoboko kwayo gukomeye ku bayo, ntayari ihari, uretse gusa mu matsinda amwe n'amwe yari ari aho ku ruhande. Nyamara, Imana ihimbazwe, iyo mbaraga yarakwirakwiraga kandi yari yariyongereye ugereranije n'iyari iri mu gihe cy'Ubugorozi.

Ni muri iki gisekuru hagaragaye uwo bakunze kwita Se w'ivugabutumwa ry'abamisiyoneri. William Carey, umudozi w'inkweto w'umugi, wari umushumba w'itorero ry'Ababatisita Ryihariye ry'i Moulton, mu Bwongereza, ahagurutsa ububyutse bw'imbaraga mu bantu abwiriza ku ngingo ikurikira: "Itegeko ryahawwe Intumwa ryo kujya kwigisha amahanga yose, ese ntiryari itegeko ku babwirizabutumwa bose bazakurikiraho, kugeza ku mperuka y'isi, kubera ko isezerano ryajyanaga n'iryo tegeko na ryo ryagendaga rikageza ku mperuka y'isi? Arwanywa n'abizeraga inyigisho ya Calvin, bari barigishije inyigisho ishingiye ku gutoranywa ku rwego rwo hejuru, bizera ko abagomba gukizwa bose BAZAKIZWA, kandi ko umurimo w'ivugabutumwa wakorwaga n'abamisiyoneri wari unyuranije n'umurimo w'Umwuka. Ariko Andrew Fuller afasha Bwana Carey ku bw'ibibwirizwa bye n'inkunga zabaga zakusanijwe. Umusaruro wabyo uba uw'isosiyete ivuka mu wa 1792, mu mugambi wo kwamamaza Ubutumwa Bwiza mu mahanga yose. Iyo sosiyete yohereza Carey, icyo gihe Imana imuha umugisha by'umwihariko imubashisha kuronka ubugingo mu Buhinde. Mu wa 1795, ubukrisitu bwari bufite ububyutse butangiza isosiyeti y'ivugabutumwa y'abamisiyoneri b'i Londres, iyo, nk'uko tubizi twese, ikusanya amamiliyonu y'amafaranga akoreshwu mu Bwongereza "Livres sterlings", maze yohereza ibihumbi by'abamisiyoneri uko umwaka utashye, kugira ngo basohoze ubushake bw'Umwami. Umwuka w'Imana yari ari ku murimo. "Haracyari izindi ntama". Rishobora rwose kuba ari ijwi ritera hejuru n'urusaku riturutse mu mutima w'abo bizera b'intwari zamaramaje.

"Nashyize imbere yawe urugi rukinguye". Nashakaga na none gusuzuma ayo magambo. Sinshaka kuyatandukanya n'iyo nkubiri y'ingendo z'ivugabutumwa z'abamisiyoneri, ariko ngiye kuberekha hano igitekerezo cyakomeje kugarukwaho cyane mu gisekuru cya nyuma. Nk'uko nigeze kubivuga, iki gisekuru gifite ukuntu gikomeza kikinjira no mu gisekuru cya nyuma. Ni muri iki gisekuru Yesu yavuze ati: "Ndaza vuba" (umurongo wa 11), kandi ni ku byerekeye igisekuru cya nyuma Yavuze ko yari agiye: "Gusoza umurimo kandi akagabanya iminsi yawo mu gukiranuka, kubera ko Umwami azakora umurimo mu gihe kigabaniwe gito ku isi". Abaroma 9:28 (Bibiliya insobanuro ya Darby). Murebe uko uwo murongo uvuga wo mu Byahishuwe 3:8:

*"urugi rukinguye—imbaraga nke, Ijambo, Izina."* Urugi rukinguye rujyana n'ibyo bintu uko ari bitatu. Nyamara, urugi rusobanura iki?

Muri Yohana 10:7, haravuga, hati:

*"Nuko Yesu arongera arababwira, ati: 'Ni ukuri ni ukuri ndababwira ko ari NGE REMBO (URUGI mu nsobanuro nyakuri ya Bibiliya.-Usobanura.) RY'INTAMA.*

Ni iby'ukuri: "NDIHO" NI We rugi rukingira intama. Nyamara, ibi nta bwo ari imvugo iri aho idafite igisobanuro. Ni ikintu rwose cy'ukuri. Nimurebe, muri Yohana 10, igihe Yesu yaciye umugani, Yiyita: "Umwungeri". Kandi na none akongera Akiyita: "Urugi". Kandi rwose ni cyo umwungeri ari cyo ku ntama: mu by'ukuri We ni Urugi ruzikingira.

Igihe nari ndi Iburasirazuba, nabonye ko iyo umugoroba wegereje, umwungeri yateranirizaga hamwe intama zose, yazishyiraga mu rugo rwazo. Hanyuma akazibara. Nyuma yo kubona ko nta n'imwe ibuzemo, yaryamaga hagati y'ibikingi by'amarembo by'urugo rw'intama, agahinduka mu by'ukuri urugi rw'urugo rw'intama. Nta muntu wabashaga kwinjira cyangwa gusohoka keretse amunyuzeho. Yari urugi. Bukeye bw'aho, igihe natemberaga mu modoka y'ijipe ndi kumwe n'inshuti, nuko nza kubona ko umwungeri yinjiraga mu mugi ari kumwe n'umukumbi we w'intama. Ako kanya urujya n'uruza rw'ibinyabiziga rurahagarara kugira ngo rureke izo ntama zitambuke.

Nyamara, mu migi y'Iburasirazuba, si kimwe n'iwacu. Hano tubika ibicuruzwa byacu mu mazu imbere;

ariko bo, ni kimwe no mu isoko rigari aho abaturage batereka ibantu byabo basaruye mu mirima yabo aho ku butaka, kandi aho ni ho abaguzi babo babasha kubireba uko bashaka. Ndatekereza nti: "Oh! Ra ra! Hagiye kuba akavuyo habeho gushwana. Buretse gato ziriya ntama zibone biriya byo kurya byose biteretse hariya." Arikorero umwungeri yagendaga imbere yazo, kandi zo zari zishishikajwe no kumukurikira zidakebakeba, intambwe ku ntambwe. Zitegerezaga ibyo bintu byiza byose, arikorero nta ntama n'imwe yabikoragaho. Yoo! Iyo nza kuba nari nzi ururimi rwaho, uwange najyaga guhagarika urugendo kugira ngo mbabwirize ikibwiriza ku birebana n'ibyo nari maze kubona.

Niba muri intama z'Umwungeri mukuru, mumukurikira mudakebakeba, intambwe ku ntambwe kimwe n'izo ntama. Ntimuzageragezwa ngo mukururwe muhindukire muge mu itorero ryiza rifite igikundiro, cyangwa ngo mwumvire ijwi ry'umwigisha w'umuhangha mu bya tewolojiya, mu bya filozofiya cyangwa mu by'amategeko, ahubwo muzagumana n'Umwungeri. Bibiliya ivuga ko intama zimenya ijwi Rye, kandi zikamukurikira, mu gihe ijwi ry'undi rituma zihunga kandi zikiruka zisanga Umwungeri nyakuri. Icyubahiro kibe ik'Imana!

Arikorero si ibyo gusa nabonye kandi nigiye aho hantu. Umunsi umwe, natangiye gutekereza ku bantu nari narabonye bari baragiye amatungo anyuranye mu gasozi. Umwe muri bo yari aragiye ingurube, undi ihene, undi ingamiya, undi inyumbu, n'ibindi. Icyo gihe, mbaza inshuti yari ituye muri ako gace uko bitaga abo bantu.

Yoo ! Arasubiza ati : « Ni abungeri. »

Nagiye kubyemera bingoye. Ndamubwira nti: "Ntushake kuvuga ko BOSE ari abungeri. Abungeri ni abaragira intama, nta bandi, si ko bimeze?

Oya, ari ko avuga, ati: "Umwungeri ni umuntu ureba amatungo ayahagazeho cyangwa uragira amatungo; ku bw'ibyo, abantu bose baragira amatungo ni abungeri."

Rwose, mu by'ukuri nari natangaye. Arikorero nabonaga ko hari hari itandukaniro riri hagati y'abo bashumba, n'abari baragiye intama. Umugoroba ugeze, bose, uretse gusa abungeri b'intama, basigaga amatungo yabo mu gasosi, kandi bitahiraga imuhira. Umwungeri, we, yajyanaga n'intama ze, akazicyura, akazicyura mu rugo rwazo, akaryama mu marembo aho zinjirira maze agahinduka atyo urugi rukingira intama. Yoo! Icyubahiro kibe ik'Imana, Umwungeri wacu ntajya adusiga na rimwe, kandi ntazigera atureka na rimwe. Igihe umugoroba ugeze, nifuza kuba ndi mu rugo Rwe rw'intama. Nifuza kuba ndi munsi y'uburinzi Bwe.

Na none dushobora kubona ko YESU ARI WE RUGI. Ni we rugi rukingira intama. Kandi mwitegereeze neza murabona ko havugwa iby'URUGI RUKINGUYE. Ni iki kindi kitari uguhishurwa Kwe? Kandi uko Kwhishura gutangira kutwigaragariza kugira ngo kuduhe imbaraga, kugira ngo kumurikire Ijambo kandi guheshe ikuzo Izina Rye. Ni mu gihe k'ibi bisekuru bibiri bya nyuma ni bwo Uguhishurwa k'Ubumana bwa Yesu Kristo kwigaragaje kweruye imbere yacu. Yego, twari tuzi ko yari Imana. Bitari ibyo, ni buryo ki Yajyaga kubasha kuba Umucunguzi wacu? Arikorero ibyerekeye kumenya ko yari yo MANA YONYINE, CYANGWA KO NTA KINDI YARI CYO USIBYE IMANA, ko yari Alufa (Itangiriro) na Omega (Iherezo), ko uwo "Yesu icyarimwe yari UMWAMI NA KRISTO", KU BW'IBYO AKABA UMWAMI YESU KRISTO, DATA, UMWANA N'UMWUKA WERA, BYOSE MU MUNTU UMWWE, - Ibyo byose byari byarazimijwe kuva mu bisekuru bya mbere by'itorero, arikorero ubu, turongera tukabibona. Dufite na none uguhishurira k'UWO YARI WE.

Ku bw'ibyo, Ubumana nta bwo ari Imana imwe mu baperisona batatu, bwaba bufite ubumuntu bumwe, kuko bisaba kugira ubumuntu kugira ngo ubone umuntu. Niba hari ubumuntu BUMWE gusa, haba hari umuntu umwe gusa. Nyamara, abizera abaperisona batatu baba bafite Ubumana mu mana eshatu, kandi bizanira urubanza rwo kuba bishe itegeko rya mbere.

Arikorero uguhishurwa k'Ubumana kongeye kutugarukira. Ubu, Itorero nyakuri rishobora kongera kwiyongera mu mbaraga. Nyuma y'icyo gihe cyose, rizi noneho UMWAMI waryo uwo ari We. Twongeye KUBATIZA MU IZINA RY'UMWAMI YESU, NK'uko babikoraga kuri Pantekote.

Ngiye kubarotorera inzozi Imana yampaye ku byerekeye umubatizo w'ubutatu. Nta bwo ryari iyerekwa, ahubwo ni inzozi. Murabizi, ibyo mbizi neza, ko umwe mu migisha y'ibisekuru by'itorero kwari uguhabwa inzozi ku bw'Umwuka Wera, neza neza nk'uko ubasha guhabwa amayerekwa. Hari kuwa Gatandatu mu gitondo, nko mu masaa kenda. Nari nakanguwe no kugira ngo mpe utuzi Joseph. Igihe nongeraga kuryama, nahise nsinzira noneho ndota izo nzozi.

Nuko mbona umugabo wakagombye kuba nka data. Yari muremure kandi ari umunyembaraga. Nabonaga na none umugore, wakagombye kuba mama, arikorero utarasaga na we, kimwe n'uwo mugabo na we ntiyasaga na data. Uwo mugabo yari umugome cyane ku mugore we. Yari afite mu ntoke ze inkoni nini ifite amashami atatu. Murazi, yari imeze nk'umwase wa mpandeshatu basa mu giti n'ishoka kugira ngo babone inkwi zo gucana. Yakubitishaga umugore we iyo nkoni, kugeza ubwo aguye. Kandi mu gihe yari arambaraye hasi arira, undi yagendaga amuzenguruka areze agatuza, kandi mu maso he hagaragaza

ubwirasi nk'ubwo, n'ukwihongora nk'uko, ku buryo by'umwihariko yasaga n'unezerewe ku bw'ibyo, anejejwe no kuba yakubise uwo mugore wo kubabariwa. Buri gihe uko yageragezaga guhaguruka, yaramukubitaga.

Kubera ko rwose ntemeranyanga n'ibyo yakoraga, natekereje kumuagarika, ariko ndibwira nti: "sinshobora guhangara uyu muntu - rwose ni umuntu w'ibigango cyane. Ikindi kandi, yakagombye kuba nka data." Ariko, muri nge, nari nzi ko atari data, kandi nari nzi ko nta muntu n'umwe ufite uburenganzira bwo gufata umugore atyo. Naragiye ndamwegera, mufata mu mashati, ndamuhindukiza, hanyuma ndamubwira nti: "Nta burenganzira ufite bwo kumukubita." Mu gihe navugaga ibyo, imikaya yange yarabyimbye, nuko kandi nahindutse umuntu w'ighanda. Uwo mugabo yarabibonaga, nuko atangira kuntinya. Naravuze nti: "Niwigera kumukubita, urambona." Ntiyongeye gutinyuka kumukubita, nuko inzozi zirarangira.

Nyuma y'izo nzozi nahise mbyuka. Mu by'ukuri nabibonye nk'ibidasanzwe. Nibazaga impamvu narose inzozi kuri uwo mugore, mu gihe Yahise aza; nahise mbona Ukugaragara kw'Imana nuko impa ubusobanuro bw'izo nzozi. (kandi muzi neza ko atari uko gusa nagiye nsobanura inzozi zanyu neza neza nk'uko ziri, ahubwo inshuro nyinshi nagiye mbabwira n'inzozi mwarose bitabasabye ko muzimbwira?) Umugore agaragaza itorero ry'isi ryo muri iyi munsi. Navukiye muri iyo myanda y'urudubi - muri iyo myanda y'urudubi aho ari. Yagaragaraga nk'umugore utameze neza (ni we nyina w'abamaraya). Umugabo we agaragaza amadini ariyobora. Inkoni y'amashami atatu igaragaza umubatizo w'ikinyoma w'ubutatu, mu mazina y'imrimo itatu. Buri gihe uko yageragezaga guhaguruka (ni ukuvuga ngo ige cyose amateraniro yatangiraga kwemera ukuri), yarayagushaga yifashishije iyo nyigisho y'ikinyoma. Yari umugabo w'ibigango cyane ku buryo nabanje kumutinya, ariko uhereye ige natangiriye kumusatira murwanya, ico gihe ni bwo imikaya yange yahise ibyimba maze nuzura imbaraga. Yari IMIKAYA Y'UKWIZERA. Inyigisho dukura muri izo nzozi, yari uko "Kubera ko Imana iri kumwe nange kandi ikaba ibasha kumpa imbaraga nk'izo, ico gihe ni ngombwa ko ndwanirira itorero, ndwanya imbaraga z'amadini y'isi, kandi nkayirwanya, kugira ngo ireke kurikubita".

Nta bwo nshaka nabusa kubaka inyigisho mpereye kuri izo nzozi. Nta nubwo nshaka gushimangira neza ukuri kw'inyigisho nshyigikiye nshingiye kuri izo nzozi. Ushobora kubona Ubumwe bw'Ubumanu uhereye mu Itangiriro 1:1 ukageza mu Byahishuwe 22:21. Ariko abantu bahumishijwe n'inyigisho yahimbwe n'abantu y'ubutatu, ihabanye n'Ibyanditswe, kandi iyo nyigisho yahimbwe yemerwa mu isi yose ku buryo urebye bidashoboka kugergeza kubona ukuri: "Imana imwe rukumbi mu Muntu Umwe." Niba abantu badashobora kubona UKURI ku byerekeye Ubumanu, ahubwo bakabirwanya, rero ico gihe ntibazabasha na rimwe kubona ukuri gusigaye, kuko, IBYAHISHUWE, NI YESU KRISTO MU ITORERO RYE, KANDI IMIRIMO YE YIGARAGAZA MU ITORERO MU GIHE K'IBISEKURU BIRINDWI. Mbese ibyo mwabyumvise? Ndahamya neza ko mubyumva.

« Ufite imbaraga nke nyamara ukitondera Ijambo ryange, » kandi ntiwhakane Izina ryange.» Twigeze kuvuga ku mbaraga yari irimo kugaruka. Rwose ni byo byabagaho. Imbaraga z'urukiko rucira imanza abahakana inyigisho ya Roma zari zagabanutse. Abantu bari barabohotse kandi bashaka ukwisyira ukizana mu gusenga. Ingoyi y'inezgo z'idini yari irimo gucika. Za Leta zabonaga ko ari ibantu by'ubushishozi kudashyigikira ishyaka rimwe kurirutisha irindi. Ku bw'ibyo, abantu bari bayobowe nabi, nubwo rwose bari bafite ubushake, bari biteguye kujya mu ntambara bakarwanirira uburenganzira bw'emyemerere yabo. Birashoboka ko ukwigaragaza gukomeye kw'imbaraga zaki dini zo muri ico giseguru kwatewe n'ububyutse bukomeye bwaturutse kuri Wesley bwaburijemo impinduramatwara mu Bwongereza, mu gihe iyo nkubiri y'impinduramatwara yajegeje Ubufaransa. Ku bw'ibyo, Ubwongereza bukarindwa, kugira ngo bube igikoresho k'Imana mu myaka myinshi myiza bihebuje.

Nta na rimwe ukubwirizwa kw'Ijambo kwigeze gufata intera nk'iyo. Mu gihe Satani yateguraga gukoresha abantu be bigenga bashyira imbere ibitekerezo byabo, ku buryo abo bahaguruka bakaboneka mu itangira ry'ubukomunisite, kandi ico gihe abahanga mu byatewolojiya bigenga bakwirakwizaga hose ubwando bw'ibicuruzwa byabo, Imana ihagurutsa abarwanyi b'imbaraga b'ukwizera, n'imrimo ikomeye kurushaho y'inyandiko za gikristu, y'inyigisho n'iyo kubwiriza, ikomoka muri ico gihe. Nta na rimwe Ababwirizabutumwa n'abigisha b'ico giseguruza bigeze bagira abo bahwana na bo, kandi ntibazigera na rimwe bagira abo bahwana na bo. Ba Spurgeon, Parker, McClarens, ba Edward, Bunyan, Müller, Brainard, Barnes, Bishop, abo bose ni abo muri ico gihe. Barabwirije, barigisha kandi bandika Ijambo. Bahesheje ikuzo Izina Rye.

## URUBANZA RW'ABAYUDA B'IBINYOMA

Ibyahishuwe 3:9:

*"Dore nguhaye bamwe bo mu isinagogi ya Satani, biyita Abayuda nyamara atari bo, ahubwo ari abanyabinyoma; dore, nzabahata kuza bikubite imbere y'ibirenge byawe, bamenye yuko nagukunze."*

Turahita tubona ko ico kibazo cy'abayuda b'ibinyoma -cyangwa se abizera b'ibinyoma-bari barigeze

kubaho mu gisekuru cya kabiri. Abo biyitaga izina ry'abayuda mu binyoma bahise bagaragara nyuma yo gusukwa k'umwuka kwa mbere ko mu gisekuru cya mbere, kandi dore bongeye kugaragara mu gisekuru gikurikira Ubugorozi. Ntubasha na rimwe kubona aho ikintu runaka rwose kibayeho gitunguranye. Ibyo rwose nta hantu bihuriye n'ikintu kibayeho k'impanuka: ni ihame rya Satani. Iryo hame ni ugukora idini, no kuvuga ko ari bo babayeho mbere kandi ibyo bakabikuramo uburenganzira n'amahirwe adasanzwe. Ngiye kubibereka.

Mu gisekuru cya Simuruna, hari hari abantu babeshyaga bavuga ko bari Abayuda (cyangwa se abizera) nyakuri, mu gihe batari bo na busa. Bari abo mu isinagogi ya Satani. Bari abo mu itsinda ryahindutse idini rya Satani, kuko ni muri icyo gisekuru tubona abakozi b'Imana bagira ububasha budasobanutse kuri bene se mu murimo w'Imana (abepisikopi bashyirwaho n'uturere bakaba hejuru y'abasaza b'itorero). Hanyuma, twabonye ko mu gisekuru cya gatatu, rwose hari hari ahantu hitwa: "intebe y'ubwami bwa Satani." Icyo gisekuru cyatweretse ukuba umwe kw'Itorero na Leta. Rishyigikiwe n'imbaraga za Leta, itorero ryahindutse mu by'ukuri iritanyeganyezwa, mu buryo bufatika. Ariko Imana isenya ubwo bubata n'Ubwo hariho izo mbaraga za Leta, kandi Ubugorozi buzana umucyo ukomeye. Ariko se ni iki cyabayeho? Kandi abayoboke ba Luther bishyize hamwe bihuza na Leta, kandi twongera kubona na none isinagogi ya Satani igaragajwe mu gisekuru cya Gatandatu.

Ni byo rwose, abo muri iyo sinagogi ntibazemera ko ari aba Satani. Oya, mugenzi. Bavuga ko ari ab'Imana. Nyamara barabeshya. Kuko Umuyuda w'ukuri (kandi ni cyo bavugaga ko bari cyo), n'Umuyuda w'imbere - mu Mwuka. Ku bw'ibyo, ni abayuda b'ibinyoma, ibyo bisobanura ko bameze nk'uko bivugwa muri Yuda 19 hagira, hati: "Ntibafite umwuka". Abana b'Imana babyawe n'Umwuka. Bo ntibafite umwuka, kandi ku bw'ibyo, NTA BWO ari abana b'Imana, tutitaye ku guhakana kwabo kose, n'ibyo bakora kugira ngo bagerageze kugaragaza ko ari bo. BARAPFUYE. Ni abana b'idini; ntibafite imbuto nyakuri. Bubatse ku myemerere yabo bwite, amahame, n'inyigisho, kandi ukuri ntikuri muri bo. Kuko bashyize imigambi yabo bwite hejuru y'Ijambo ry'Imana.

Ndashaka kubereka ibyo nagerageje kwigisha muri iyi nyigisho yange ndende, ku byerekeye imizabibu ibiri ikomoka ku myuka ibiri ihabanye. Ubu bwo reka dufate urugero rwa Yesu na Yuda. Yesu yari umwana w'Imana. Yuda yari umwana wo kurimbuka. Imana yinjiye muri Yesu. Satani yinjiye muri Yuda. Yesu yari afite ubukozi bwuzuye Umwuka Wera, kuko

*"Mu uko Imana yasize Yesu w'i Nazareti Umwuka wera n'Imbaraga, wajyaga ahantu hose agira neza kandi akiza ababaga batwajwe igitugu n'umwanzi bose, kuko Imana yari Iri kumwe na We. Ibyakozwe n'intumwa 10:38.*

"We (Yuda) yabariwe muri twe, kandi na we yari afite UMUGABANE ku murimo umwe natwe," Ibyakozwe n'Intumwa 1:17.

Matayo 10:1 haravuga, hati:

*"Nuko ahamagara abigishwa be uko ari cumi na babiri, maze abaha ububasha bwo kwirukana abadayimoni n'emyuka mibi, no gukiza indwara n'ubumuga bwose."*

Uwo mwuka, wari uri muri Yuda, wakomeje kugendana n'umurimo wa Yesu. Hanyuma, bombi bagera ku musaraba. Yesu abambwa ku musaraba, atanga Ubugingo Bwe ku bushake ku bw'abanyabyaha, kandi ashyira Umwuka We mu Biganza by'Imana. Umwuka We wagiye ku Mana, kugira ngo nyuma y'aho uzasukwe mu Itorero ku munsi wa Pantekote. Ariko Yuda we yarimanitse, kandi umwuka we wasubiye kuri Satani; ariko, nyuma ya Pantekoti, uwo mwuka wari uri muri Yuda wamanukiye mu muzabibu w'ikinyoma, umera ubangikanye n'umuzabibu w'ukuri. Ariko nimurebe, umwuka wa Yuda ntiwagiye ngo ugere kuri Pantekote. Ntiyigeze ajya guhabwa Umwuka Wera. Ibyo kuri we ntibyashobokaga. Ariko se uyu mwuka wa Yuda washakaga iki? Washakaga uruhago rwuzuye zahabu. Uko wakundaga amafaranga. Na n'ubu uracyayakunda. Niba yariteraga hejuru akajya aha na hariya mu Izina rya Yesu, agakora ibantu bikomeye, kandi agakoresha amateraniro akomeye, icyo yarebagaho cyane na none ni amafaranga, inyubako, ubuhanga, n'ibindi byose bijyanye n'ibintu bifatika. Nimwitegerezze rwose umwuka uri kuri bo, maze ntimwemere gushukwa.

Yuda yari umwe muri cumi na babiri, kandi na we yakoraga ibitangaza, NTA BWO we ubwe yari afite Umwuka w'Imana. Icyo yari afite, ni ubukozi. Ntiyigeze agenda ngo agere kuri Pantekote, kuko atari ari mu bakomoka ku mbuto y'ukuri. Nta bwo yari umwana w'Imana w'ukuri. Oya, mugenzi. Kandi kugeza ubu, ni ko ibyo bintu bikigenda mu isinagogi ya Satani. Ntimukemere gushukwa. Ntimuzemera gushukwa niba rwose muri mu ntore. Yesu yavuze ko mutajyaga kwemera gushukwa.

Ni byo, abo bantu bavuga ko ari Abakristo, nyamara si bo.

*"Dore nzabahata kuza bikubite imbere y'ibirenge byawe, bamenye ko nagukunze."*

"Ese ntumizi ko abera bazacira isi urubanza?"

Ntihazaba hari gusa intumwa cumi n'ebyiri, zicaye ku ntebe z'ubucamanza cumi n'ebyiri, zicira urubanza imiryango cumi n'ibiru ya Isirayeli, ahubwo n'abera na bo bazacira isi urubanza. Aho ni ho abavuga ko ari ab'Imana kandi bakanavuga ko Imana Ibakunda bazabona neza uwo Umwana w'Imana uwo ari we, kandi akaba yarakunzwe n'Umwana. Ni byo, umunsi uraje aho ibyo byose bizashiyirwa ahagaragara. Abayoboye isi, muri iki gihe, mu rugero rw'ikigero runaka, kandi abo, mu gihe k'gisekuru cya nyuma bazarema igishushanyo k'inyamaswa icyo bazifashisha mu by'ukuri kugira ngo bayobore isi, abo ngabo bazakorwa n'isoni bacishwe bugufi umunsi umwe, igehe Yesu azazana n'abera Be kugira ngo bacire isi urubanza bashingiye ku gukiranuka. Ibyo ni byo neza neza twabonye muri Matayo 25, aho abatarabonetse mu muzuko wa mbere "bose" bazagaragara imbere y'Umucamanza n'Umugen We.

### **ISHIMWE N'ISEZERANO**

Ibyahishuwe 3:10:

*"Kuko witondeye Ijambo ryo kwihangana kwange, nange nzakurinda mu gihe cyo kugeragezwa kigiye kuza mubihugu byose, kugerageza abari mu isi." [Bibiliya insobanuro ya Darby. - Usobanura]*

"Ijambo ryo kwihangana kwange", aba ashate kuvuga iki? Abaheburayo 6:13-15:

"Ubwo Imana yasezeraniraga Aburahamu, kuko ari nta we yajyaga kurahira uyiruta ubwayo, ni cyo cyatumye yirahira ubwayo, iti:

"Ni ukuri no kuguha umugisha nzaguha umugisha, kandi no kugwiza nzakugwiza.'

Uko ni ko byabaye, kuko Aburahamu amaze kwihangana, yahawe ibyo yasezeranijwe." [Bibiliya insobanuro ya Darby- Usobanura]

Murabona, Umwuka aravuga Ijambo ry'Imana twahawe. Gutegereza ugusohozwa kw'iryo Jambo byasabaga ukwhangana, nk'uko ibyo byabaye kuri Aburahamu. Yarihanganye, nk'ureba ku bitagaragara. Yagize ukwhangana, kandi ku iherezo, Ijambo ryarasohoye. Nguko uko Imana yigisha ukwhangana ubwoko bwayo. Ni byo rwose, iramutse ishohoje Ijambo ryayo ku bwo kwigaragaza gufatika mu gihe rwose mugisenga, ntimpwakwiga na rimwe ukwhangana, ahubwo mwarushaho na none kuba umuntu utihanganira ubuzima. Nimureke mbagaragarize uku kuri na none mu buryo bwuzuye.

Abaheburayo 11:17:

*"Kwizera ni ko kwatumye Aburahamu atamba Isaka, ubwo yageragezwaga, kandi dore uwasezeranijwe ibyasezeranijwe (Ijambo ry'Imana), yari agiye gutamba Umwana we w'ikinege."*

Rwose ni ibyo: Aburahamu yageragejwe NYUMA yo guhabwa Ijambo ry'isezerano. Bensi batekereza ko uhereye igehe dusenze mu izina rya Yesu, kugira ngo duhabwe amasezerano meza aturuka ku Mana, hadashobora kubaho ukugeragezwa. Arikohano havuga ko Aburahamu yageragejwe nyuma y'uguhabwa isezerano. Rwose ibyo ni ko biri, dushingiye ku muhimbyi wa Zaburi ugaruka kuri Yozefu. Zaburi 105:19: "Kugeza aho Ijambo ry'Uwiteka ryasohoreye, isezerano Rye ryaramugeragezaga." [Bibiliya insobanuro ya Darby- Usobanura]

Imana yaduhaye amasezerano akomeye kandi meza bihebuje. Yasezeranye ko izayasohoza. Izabikora. Arikohagati y'igehe dusenze n'igehe duherewe igisubizo, Tugomba kwiga guhabwa ukwhangana mu bugingo, kuko ni mu kwihangana gusa tubonera ubugingo. Imana idufashe kwiga iryo somo, kubera ko tuzi ko abo mu gisekuru cya Gatandatu na bo bize kwihangana. Dushobora gusoma amateka y'imibereho y'abo Bakristo bakomeye: mbega ikinyuranyo kiri hagati y'ubuzima bwabo n'ubwacu; bariabantu batuje rwose kandi bihangana, mu gihe uyu munsi dutwarwa no kutihangana kwacu no guhutiraho.

Arababwira na none, ati: "Kubera ko wemeye Ijambo ryange, kandi ukarigenderamo, bityo ugahinduka uwihanganye, nzakurinda mu gihe cyo kugeragezwa kigiye kuza mu isi yose, kugira ngo kigerageze abayituye." Ikindi kandi, tubona ko ibi bisekuru bibiri byinjiranamo, kuko iri sezerano rirebana n'igehe cya nyuma cy'abanyamahanga, ari cyo kigera ku Mubabaro Ukomeye.

"Nzakurinda igehe cyo kugerageza kigiye kuza mu isi yose ku bwo kugerageza abatuye isi." Uyu murongo ntuvuga ko Itorero ry'ukuri riznjira mu mubabaro kandi ngo urigereho. Iyo biza kuba ibyo, Yajyaga kubivuga. Arikoharauze ati: "Nzakurinda igehe cyo kugeragezwa." Uko kugeragezwa rwose ni nko kugeragezwa ko muri Edeni neza neza. Kizaba ari ikintu gikurura cyane kizasabwa, gikozwe gihabanye ku buryo butaziguye n'icyo twahawe mu Ijambo ry'Imana; nyamara tubifashe mu mitekerereze ya kimuntu, kizaba rwose ari icy'ukuri, kizazana umucyo kurushaho, n'ubuzima, ku buryo kizayobya isi burundi. Intore zonyine ni zo zitazemera kuyobywa.

Ukugeragezwa kuzaza mu buryo bukurikira. Impuzamadini, yatangiye igendera ku ihame ryiza cyane kandi ari ikintu gihawe umugisha cyane, uko cyagaragaraga (cyo gusohoza isengesho rya Kristo ry'uko twese twaba umwe), cyahindutse ikintu gifite imbaraga nyinshi, mu bya politike, ku buryo gihatira za Leta kugira ngo zigere aho bose bahita bifatanya na yo cyangwa bakayoboka amahame yashyizeho, azafatwa nk'itegeko, ku buryo nta muntu n'umwe uzemerwa mu by'ukuri nk'itorero, keretse ayobotse ku buryo butaziguye cyangwa buziguye iyo nama mpuzamadini.

Udutsinda duto tuzatakaza uburenganzira bwatwo bwo kwemerwa, ibyo twemererwaga, n'ibindi. Kugeza ubwo bazatakaza ndetse n'imitungo yabo, n'uburenganzira bwabo bwo gufasha abantu mu by'umwuka. Urugero, mu migi myinshi, niba utarimo, ntuzabasha no gukodesha icyumba cyo gukoreramo amateraniro udafite uburenganzira uhawe n'inama y'amadini y'ako karere. Kugira ngo ube umuyobozi mu by'Umwuka mu ngabo, mu bitaro, n'ahandi, uko bigenda ni itegeko kuba uwzi n'ayo matsinda y'impuzamadini yizera ubutatu. Uko iryo tegeko ry'agahato rizagenda rikura rizakura ku buryo bwuzuye, bizarushaho gukomera kubyihanganira, kuko kubyihanganira bisobanura kubura ibyo wagenerwaga. Ni yo mpamvu benshi bazumva bifusa gukurikira iyo mpuzamadini, kubera ko bazagira igitekerezo cy'uko bahitamo gukorera Imana ku mugaragaro mu rwego rw'ryo shyirahamwe, aho kugira ngo babure burundi uburyo bwo kuyikorera ku mugaragaro. Ariko baribesha. Kwizera ikinyoma cya Satani, ni ugukorera Satani, nubwo mwakwifusa kumuha Izina rya Yehova. Ariko intore ntizizayobywa.

Ikindi kandi, Intore nta bwo gusa zizarindwa, ahubwo igihe iyo mpuzamadini izahinduka "IGISHUSHANYO CYAREMWYE K'INYAMANSWA", abera bazaba baramaze kujyanwa mu Izamurwa. Kandi icyo kintu k'impuzamadini kiyobia kandi cyuzuye uburiganya bwo kwifuzwa cyari cyaratangiye mu mwuka w'ubusabane mu gihe cya Efeso, izahinduka ikintu giteye ubwoba cya Satani, kizanduza kandi kikayobia isi yose. Kuko muri uko kwishyira hamwe, imikorere ya za Kiliziya Gatolika y'i Roma ndetse n'Abaporotesitanti bazaba bafite ububasha ku mitungo n'imbaraga z'imiyoborere y'isi, kandi kubw'ibyo bazagusha mu mutego wabo wa kidini isi yose uko yakabaye, kandi bazarimbuza abanze kugendana na bo, babavutsa uburenganzira bwo kugura no kugurisha, ari byo by'ibanze kugira ngo ubeho. Ibyo byose bizasohora rwose, kuko abakobwa ba maraya mu bigaragara bamaze kumugarukira. Hagati aho, Roma yikubiye hafi zahabu yose ibitswe. Abayahuda bafite impapuro mvunjwafaranga n'amafaranga yose. Igihe nikigera, maraya azasenya imikoreshereze y'amafaranga iriho, azane amafaranga yose iwabo kandi asabe ko hakoreshwah zahabu. Nta zahabu, imikorere izasenyuka. Abayahuda bazagwa mu mutego kandi bazinjira mu isezerano, kandi itorero rya Maraya rizafata ubuyobozi bw'isi yose.

### **ISEZERANO YASEZERANIJE ABAYO**

Ibyahishuwe 3:11-12:

"Ndaza vuba, komeza ibyo ufite hatagira ugutwara ikamba ryawe.

*Unesha nzamugira inkingi yo mu rusengero rw'Imana yange kandi ntazasohoka ukundi, nange nzamwandikaho Izina ry'Imana yange n'iry'ururembo rw'Imana yange ari rwo Yerusalem nshya, izamanuka iva mu ijuru iturutse ku Mana yange, kandi nzamwandikaho Izina ryange rishya."*

Ntidukeneye gutinda cyane ku by'uko Aje vuba. Tuzi ko ari ko bimeze, kubera ko turi ku iherezo ry'iminsi ya nyuma, si ko biri? Ariko na none aravuga ati: "Komeza icyo ufite, kugira ngo hatagira ugutwara ikamba ryawe."

Mu gihe k'ibibazo bikomeye ni bwo Yesu aza. kandi kuza Kwe kugendana n'umuzuko. Benshi bazava mu mukungugu, bazazuka kugira ngo babane n'abazaba bakiriho ariko bategereje Ukugaruka Kwe. Bazahabwaamakamba. Kubera iki? Kubera ko ari Abana b'Imana. Ni abami hamwe na We. Bimana ingoma hamwe na We. Ngicyo icyo ikamba bisobanuye: kwima ingoma no gutegekana n'Umwami ukomeye We ubwe. Ni isezerano ryasezeraniwe abababariye hano ku isi hamwe na We -abategereje bose bihanganye, bazi ko Imana, Umucamanza w'Ukuri, Yajyaga kuzabagororera. Abaretse byose ku Bwe, Kandi bakaba barashyize byose mu biganza Bye, bazicarana na We ku Ntebe y'Ubwami, bazagira umugabane mu bwami Bwe bw'Ikuzo.

Yoo! Twahawe Ijambo muri icyo gihe rigira riti: "Hagarara ushikamye - ihangane ushyireho umuhati. Ntimucogore. Mwambare intwaro zose z'Imana, - mukoreshe buri ntwaro yaduhaye-mufate buri mpano dufite, kandi muhange amaso imbire munezerewe, kuko tugiye kwambikwa amakamba n'Umwami w'abami n'Umutware utwara Abatware.

Nyamara, nta bwo atanga amakamba gusa, ahubwo avuga ko abari mu mugeni bazahinduka inkingi mu Rusengero rw'Imana. Ariko se urusengero rw'Imana, ni ki? Yesu yavugaga umubiri We avuga ko ari wo wari urwo rusengero. Kandi rwose icyo ni cyo wari Cyo. Umubiri We wari urusengero rw'Imana. Ariko ubu kuvuga ko turi umubiri We, Itorerero ry'ukuri ni ryo rusengero rw'Imana ku bw'Umwuka Wera uri muri twe. Noneho unesha azamugira inkingi muri urwo rusengero. Ariko se inkingi ni iki? Inkingi, ni igice cy'urufatiro, kuko ari yo ishyigikira igisenge. Icyubahiro kibe ik'Imana! Ngicyo igishyira unesha mu rwego rumwe

rw'intumwa n'abahanuzi, kuko mu Befeso 2:19-22 handitswe ngo:

*"Nuko ntimukiri abashyitsi n'abasuhuke, ahubwo muri ubwoko bumwe n'abera ndetse muri abo mu nzu y'Imana,*

*kuko mwubatse ku rufatiro rw'intumwa n'abahanuzi, ariko Kristo Yesu ni we buye rikomeza imfuruka.*

*Muri we inzu yose iteranijwe neza, irakura ngo ibe urusengero rwera mu Mwami Yesu. Muri we namwe murubakanwa, kugira ngo mube inzu yo kubabwamo n'Imana mu Mwuka."*

Ni byo, uyu murongo wa 22 uvuga neza ko dukora nka bo, igice k'in'yubako. Byose byagombye guca mu IREMBO (Yesu) kandi biba ibigize uwo mubiri, cyangwa urusengero. Nyamara, igihe Imana ishyize umuntu mu rusengero kugira ngo imugire inkingi, icyo gihe imugira agace k'iryo tsinda rigize urufatiro, ni iki ikora mu by'ukuri? Imuha uguhishurirwa Ijambo na Yo ubwayo, kubera ko ari cyo neza neza intumwa n'abahanuzi bahawe. Matayo 16:17. Ari aho, mu Ijambo. Aho ni ho ahagaze. Nta muntu n'umwe ubasha kurimukuramo.

Nimurebe rwose uburemere bw'iri jambo: "unesha." Yohana abaza ikibazo ati : "unesha ni nde?", kandi igisubizo gihita kiboneka ni: "Uwizera ko Yesu ari we Kristo." Nta bwo havuga ko unesha ari uwizera Yesu "ukwe" na Kristo "UKWE", ahubwo ni uwizera ko Yesu ARI WE KRISTO- Umuntu UMWE RUKUMBI, nta bwo ari babiri. Ni uwabatijwe mu Izina ry'Umwami Yesu Kristo.

Hano Imana iravuga ku mugeni. Ese murifuza kureba ikindi gishushanyo ke?

Tugisanga kure cyane mu Byahishuwe 7 :4-17 :

*Numva umubare w'abashyizweho ikimenyetso ngo ni agahumbi n'inzovu enye n'ibihumbi bine. Ni bo bashyizweho ikimenyetso bo mu muryango yose y'Abisirayeli.*

*Abo mu muryango wa Yuda bashyizweho ikimenyetso ni inzovu n'ibihumbi bibiri. Abo mu muryango wa Rubeni ni inzovu n'ibihumbi bibiri. Abo mu muryango wa Gadi ni inzovu n'ibihumbi bibiri.*

*Abo mu muryango wa Asheri ni inzovu n'ibihumbi bibiri. Abo mu muryango wa Nafutali ni inzovu n'ibihumbi bibiri. Abo mu muryango wa Manase ni inzovu n'ibihumbi bibiri.*

*Abo mu muryango wa Simiyoni ni inzovu n'ibihumbi bibiri. Abo mu muryango wa Lewi ni inzovu n'ibihumbi bibiri. Abo mu muryango wa Isakari ni inzovu n'ibihumbi bibiri.*

*Abo mu muryango wa Zebuluni ni inzovu n'ibihumbi bibiri. Abo mu muryango wa Yosefu ni inzovu n'ibihumbi bibiri. Abo mu muryango wa Benyamini ni inzovu n'ibihumbi bibiri.*

*Hanyuma y'ibyo mbona abantu benshi umuntu atabasha kubara, bo mu mahanga yose n'imiryango yose n'amoko yose n'indimi zose, bahagaze imbere ya ya ntebe n'imbere y'Umwana w'Intama, bambaye ibishura byera kandi bafite amashami y'imikindo mu ntoki zabo,*

*bavuga ijwi rirenga bati : "Agakiza ni ak'Imana yacu yicaye ku ntebe n'ak'Umwana w'Intama."*

*Nuko abamarayika bose bari bahagaze bagose iyo ntebe na ba bakuru na bya bizima bine, bikubita hasi bubamye imbere y'intebe, baramya Imana bati*

*"Amen, amahirwe n'icyubahiro n'ubwenge n'ishimwe, no guhimbazwa n'ubutware n'imbaraga bibe iby'Imana yacu iteka ryose, Amen."*

*Umwe muri ba bakuru arambaza ati : "Aba bambaye ibishura byera ni bande kandi bavuye he?"*

*Ndamusubiza nti : "Mwami wange, ni wowe ubizi." Arambwira ati : "Aba ni abavuye muri urya mubabaro mwinshi, kandi bameshe ibishura byabo babyjesha amaraso y'Umwana w'Intama.*

*Ni cyo gituma baba imbere y'intebe y'Imana, bakayikorera mu rusengero rwayo ku manywa na njoro, kandi Iyicaye ku ntebe izababambaho ihema ryayo.*

*Ntibazicwa n'inzara ukundi, kandi ntibazicwa n'inyota ukundi kandi izuba ntirizabica cyangwa icyokere cyose,*

*kuko Umwana w'Intama uri hagati y'intebe y'ubwami, azabaragira akabuhira amasoko y'amazi y'ubugingo, kandi Imana izahanagura amarira yose ku maso yabo."*

Yesu yaraje. Yashyize ikimenyetso ku 144000. Yagiye afata 12000 muri buri muryango. Ariko hari irindi tsinda ritabariwa muri abo 144000; turabasanga ku murongo wa 9 kugeza ku wa18. Ni bande ? Ni ba bandi babarirwa mu mugeni wakuwe mu banyamahanga. Bari imbere y'Intebe Ye ku manywa na n'ijoro. Baramukorera mu Rusengero. Umwami abitaho by'umwihariko. Ni umugen We.

Umugen akurikira Umukwe aho ajya hose. Ntazigera amureka. Iteka azaba ari iruhande Rwe. Azasangira na We intebi y'Ubwami. Azambikwa ikamba ry'Ubwiza n'Icyubahiro Bye.

"Nzandika kuri we Izina ry'Imana yange, n'Izina ry'ururembo rw'Imana yange." Ese izina ry'Imana ni irihe? Rwose, Yari Imana hamwe natwe, Emanweli, ariko nta bwo ari ryo Zina yari yarahawe. "Uzamwite izina rya Yesu." Yesu yaravuze ati : "Naje mu Izina rya Data, kandi ntimwanyakiriye." Ku bw'ibyo, izina ry'Imana ni Yesu, kuko ni muri iryo Zina yajemo. Ni UMWAMI YESU KRISTO. Ikindi kandi, ni irihe zina umugore afata, igihe ashakanye n'umugabo? Afata izina rye (umugabo).

Izina Rye ni ryo rizahabwa Umugen igihe azaba aje kumuujyana.

Ibyahishuwe 21: 1 - 4,

*Mbona ijuru rishya n'isi nshya, kuko ijuru rya mbere n'isi ya mbere byari byashize n'inyanja yari itakiraho.*

*Mbona ururembo rwera Yerusaremu nshya rumanuka ruva mu Ijuru ku Mana, rwiteguwe nk'uko umugen arimbishirizwa umugabo we.*

*Numva ijwi rirenga kuri ya ntebe rivuga riti : "Dore ihema ry'Imana riri hamwe n'abantu kandi izaturana na bo, na bo bazaba abantu bayo kandi Imana ubwayo izabana na bo ibe Imana yabo.*

*Izahanagura amarira yose ku maso yabo kandi urupfu ntiruzabaho ukundi, kandi umuborogo cyangwa gutaka cyangwa kuribwa ntibizabaho ukundi kuko ibya mbere bizaba bishize."*

Mbega ukuntu binejeje bihebuje! Amasezerano atangaje bihebuje yose Imana yatanze azasohora. Bizaba birangiye. Ughuhindurwa kuzaba kwashohojwe. Umwana w'Intama n'Umugen We, bazaba bari mu gutungana kw'Imana ubuzira herezo. Kugaragaza ibyo uko bizaba bimeze? Ni nde wabasha wabikora? Nta muntu n'umwe. Kubitekerezaho? Kubirota? Gusoma icyo ijambo ribivugaho? Ni byo rwose, tubasha gukora ibyo byose; nyamara, tubasha gusa kubimenyaho agace k'ubusabusa, kugeza igehe ibyo byose bizahinduka ibintu by'ukuri mu muzuko wa mbere.

"Kandi nzamwandikaho IZINA RYA NGE RISHYA."

Izina ryange rishya. Igihe BYOSE bizaba byahinduwe bishya, icyo gihe Azafata Izina rishya, kandi iryo Zina ni ryo rizaba ari Izina ry'Umugen. Iryo Zina ni irihe? Ntihakwiriye kugira umuntu n'umwe wahirahira ngo agire icyo abivugaho ashingiye ku bitekerezo bye. Byasaba ko ibyo biba uguhishurirwa gutanzwe n'Umwuka, bidasubirwaho rwose ku buryo ntawatinyuka kubihakana. Ariko uko guhishurirwa kudafite gushidikanya na kumwe Azakurekera umunsi Azashakiraho guhishura iryo Zina. Byaba biduhagije kumenya ko bizaba bitangaje bihebuje ku buryo tutabasha na rimwe kubitekereza.

## **IMPUGURO YA NYUMA KURI IKI GISEKURU**

Ibyahishuwe3.13:

"Ufite ugutwi niyumve ibyo Umwuka abwira amatorero"

Buri gisekuru gihabwa uwo muburo ku bwo gusoza. Ni impuguro idahinduka ihabwa amatorero, kugira ngo yumve ijwi ry'Umwami. Muri iki gisekuru, iyo mpuguro irihutirwa na none kurusha mu bindi bisekuru byabanje, kuko muri iki gisekuru Ukugaruka kw'Umwami mu by'ukuri kuri bugufi. Umuntu yabasha kwibaza iki kibazo ati: "Niba hari ikindi gisekuru nyuma y'iki, kubera iki byihutirwa? Dore igisubizo. Igisekuru cya nyuma kizaba ari kigufi - umurimo wihuse urangiza byose. Nta bwo gusa ari uko bizaba bimeze, ahubwo ni ngombwa na none kugumana mu bitekerezo ko mu maso y'Imana, igihe ari ikintu kihuta cyane, ku bw'ibyo imyaka igihumbi ni nk'umunsi umwe. Kandi niba Agiye kuza mu masaha make, dukurikije uburyo Bwe Abonamo igihe, icyo gihe nta gushidikanya, Agomba kubanza kutuburira hakiri kare ku buryo bwihuse, kandi ijwi Rye rigomba kuvugira mu mitima yacu ubudatuza, kugira ngo tube twiteguye Ukuza Kwe.Yoo! Hari amajwi menshi mu isi, ibibazo byinshi n'ibyifuzo byinshi bikomanga ubudatuza kugira ngo kubihugireho, ariko na none nta jwi na rimwe rizigera riba iry'ingirakamaro kandi na none ngo ribe ryadusaba ko twaryitaho nk'ijwi ry'Umwuka. Ku bw'ibyo Aravuga, Ati: "Ufite amatwi yo kumva niyumve ibyo Umwuka abwira amatorero."



[www.messagehub.info](http://www.messagehub.info)

Ibibwiriza bya

**William Marrion Branham**

"...mu minsi y'ijwi ..." Ibyah. 10:7